

**VOCATIONAL
TRAINING
SKILLS
SCHOLARSHIP
PROGRAMME
(TVETSSP)
SHORTLISTED
APPLICANTS
LISTA bilong
2016 insait..
P11 na 12**

Isipla wei long promotim bisnis bilong yu

GUTPELA KWALITI, GUTPELA PRAIS LONG PNG

**Bisnis
Kads**


K120

200 kads + takis
Printin tasol

K175

200 kads + takis
wantaim disain wok

Wanpla sait, ful kala 300 gsm pepa.



KOLIM MIPLA NAO!

Sir Peter: El Nino birua em i bikpela tru

GAVANA bilong Enga, Sir Peter lpatas i tok gavman i mas tokaut ples klia long ol pipel bilong dispela kantri na tu long ol intenesenel komyuniti olsem dispela El Nino o drai sisen i wok long kamap nau long PNG em i wanpela bikpela birua.

Sir Peter i tok gavman i mas tokaut olsem dispela birua em i nesene disasta bikos long provins bilong en tasol, moa long 187,000 pipel i kisim bikpela bagarap taim ples i drai, hat long planim kaikai, na ol liklik wara bilong dring na waswas i drai.

Sir Peter i mekim dispela toktok las wik Sande ausait long Pot Mosbi we ol Enga komyuniti long Pot Mosbi i bin kamapim namba tu fan resing bilong bungim mani long helpim ol brata susa na papamama bilong ol long ples husat i kisim taim long dispela El Nino.

Dispela El Nino o drai sisen i kamap long PNG i bagarapim laip na kaikai long i no long Enga Provins tasol long ol arapela ples tu.

Tasol Kandep distrik na ol arapela ples olsem Laiagam, Piliakambi, Sirunki, Mulitaka, Kompiam, Wabag na Wapenamanda long Enga i kisim bikpela bagarap bikos fros (ais) i bin kam pas na kilim dai olgeta kaikai na bihain long en, ples i drai na hat long planim kaikai gen.

"Mi ken tokaut olsem dispela drai sisen birua em i bikpela tru long kantri. Gavman i mas tokaut klia na tok stret long pablik olsem ol manmeri i wok long kisim bikpela taim," Sir Peter i tok.

Em i tok ol liklik wara long Enga i wok long drai na ol manmeri i nau wok long kisim wara long ol bikpela wara.

Sir Peter, husat i stap long ples wantaim ol pipel na kam long Mosbi long Sande long dispela fanresing, i tok Enga Provinsal Disasta tim i wok long helpim ol manmeri wantaim ol bek rais, tin pis, na botol wara.

I go moa long pes 2...



MI TRAIM:
Samantha Vulum em wanpela bilong ol yangpela meri husat bai resis long Miss Pacific Island Pageant. Em bai karim nem bilong BSP na hap ples em wok long en. Samantha em hap kas Wes Nu Briten na Sentral. Rosemary Mawe i putim hap laplap long makim BSP. Lukim stori bilong em long pes 11. *Poto Nicky Bernard.*

Polye: Oposisen i redi long rausim gavman - P2



CS trenim 87 opisa - P7

Katim gras bilong Kast i kamapim K12000 - P8



RAUNRAUN PROMOTION

Up to **68%** off



on selected **DOMESTIC** destinations

Sale ends 25th October 2015



Air Niugini

Polye: Oposisen redi long rausim gavman

OPOSISEN Lida Don Polye i redi long muvim wanpela vot ov no konfidens long Praim Minista Peter O'Neill long Oktoba 27 taim Palamen i bung gen.

Palamen bai bung gen neks wik Tunde na Mista Polye i tok Oposisen i gat namba long rausim O'Neill-Dion gavman.

Dispela em i namba wan taim stret Oposisen i tokaut long pablik olsem ol i gat namba long rausim gavman bilong O'Neill bikos Mista Polye i tok namba bilong ol memba husat i joinim Oposisen i wok long i go antap olgeta de.

Mista Polye i tok nau yet i gat planti ol gutpela risen long rausim Mista O'Neill olsem praim minista bilong PNG bikos O'Neill i wok long brukim planti lo bilong kantri na tu em i no lukautim ikonomi bilong PNG gut.



OPOSISEN Lida Don Polye

"Mipela i no mekim dispela muv long larim mipela yet i kisim pawa. Mipela i putim pipel bilong dispela kantri i go pas na mipela i glasim na skelim gut olsem insiat long 3-pela yia tasol dispela gavman i bagarapim kantri na nau em i mas aut. Nupela praim minista i mas kisim ples bilong O'Neill," Mista Polye i tok.

Mista Polye i mekim dispela tok-tok long Sande we 5-pela Oposisen memba i bin joinim em long

wanpela midia konprens.

Pangu Pati lida na Deputy Oposisen Lida Sam Basil (Bulolo) na Vanimo-Green Memba Belden Namah (PNG Pati) tu i bin kam stap wantaim Polye long dispela miting na soim sapot long rausim O'Neill.

Mista Polye i givim 4-pela namba wan risen o ol as tru long Mista O'Neill i no ken kamap praim minista bikos -

- em i brukim lo na brukim Mama Lo bilong PNG long larim em yet i stap yet long pawa;
- em i wok long abrusim lo na les ong polis holim em long sampela asua lo i painimuat egen-sim em;
- em i wok long bagarapim nem bilong opis bilong praim minista bilong dispela kantri long larim em yet stap long pawa na kisim ol

benefit; na

- em i no lukautim o men-esim ikonomi bilong dispela kantri gut.

Mista Namah na Mista Basil i sapotim Polye long rausim O'Neill na tupela i singautim ol narapela gavman bek bensa na minista tu long joinim Oposisen na kamapim nupela gavman.

Tasol wanpela man husat i stap klostu long O'Neill na husat i makim maus bilong en i tok gavman i gat bikpela namba na olgeta memba husat i stap long gavman i stap strong wantaim O'Neill.

"Insait long 3-pela yia tasol, planti rot i kirap. Ol skul pikinini i kisim fri edukesen. Ol mama na liklik pikinini i kisim fri helt na medikol sevis long haus sik.

"Planti gutpela developmen i kamap long ol ples we bipo ol nara-

pela praim minista na gavman i no luksave long en.

"Planti nupela rot, bris, ples balus na sip bris i kamap long planti hap long PNG. Taim Mista O'Neill i wok long givim dispela kain sevis long pipel long ples na siti wantaim, mipela i no ting Oposisen bai rausim em," mausman bilong O'Neill i tok.

Em i tok moa long 56 memba bilong PNC pati i stap strong baksait long praim minista na ol i no tingting long kamapim wanpela samting long rausim Mista O'Neill.

Enga Gavana Sir Peter Ipatas tu i mekim wankain toktok las wik. Sir Peter i tok olegta PNC memba i stap strong na no gat wanpela memba i tingting long lusim pati bilong praim minista na go joinim Oposisen, husat i laik kamapim nupela gavman

PNG na Japan i sainim agrimen long stretim suris sistem

KUMUL Konsolidet Holdings (KCH) i tokaut long sainim kontrak agrimen bilong Pot Mosbi Suris Sistem Apgrad Projek (POMSSUP) wantaim Dai Nippon - Hitachi bilong Japan.

Menesing Dairekta bilong KCH, Garry Hersey i sainim dispela agrimen wantaim Presiden Representetiv Dairekta bilong Dai Nippon Konstraksen, Mitsuo Uesaka long Japan las wik.

Minista bilong Pablik Entaprais na Stet Invesmen na Divisen Dairekta bilong Global Bisnis Developmen Divisen, Hitachi Limited, Shiro Inoue i sainim dispela kontrak.

Minista Micah i tok welkam long dispela agrimen na em i tok dispela senis bai senisim laip bilong ol pipel long Mosbi na karim aut ol gutpela helpim long en-vairomen.

"Long mekim gut suris sistem bai i gat bikpela senis long laip bilong ol pipel na helt bilong 75,000 pipel long Nesanel Kapitol Distrik," Minista Micah i tok.

Minista Micah i tok, "Wantaim bikpela gro long Pot Mosbi mipela laik lukim populesen lek mak bilong ol pipel husat i kisim helpim long dispela projek insait long 30 krismas.

Em i tok dispela projek bai klinim ol wara long nambis we ol i no yusim bikos em i bagarap.



Ol lida bilong PNG na Japan bihain long sainim dispela agrimen wantaim Japan.

Minista Micah i tok dispela senis bai rausim suris long ol rot bilong wara na karim aut gutpela marin ekosistem. Dispela bai ol pipel i kisim helpim long painim pis na moa turis bai kam long dispela solwara.

Long wankain taim, Menesing Dairekta bilong KCH, Garry Hersey i tok, "Dispela saining bilong kontrak i makim bikpela samting long POMSSUP projek.

Dispela driman i kamap wantaim stadi bilong JICA i bin pinis long 2006."

"Dispela agrimen i tok orait long mipela statim konstraksen na mipela bai pinisim dispela projek long taim bilong en na mekim baset antap long ol risos Eda Ranu bai operet," Mista Hersey i tok.

Dispela agrimen bai statim konstraksen bilong siwa network,

mekim gut 9-pela pam stesin, konstraksen bilong 4-pela nupela pam stesin na stet bilong at, suris tritmen plen (STP) long Joyce Bay long Pot Mosbi. Dispela projek i kosim K369 milien.

As bilong dispela projek em long mekim gut long helt bilong ol pipel na stretim wara long ol pipel save slip sait long nambis bilong Pot Mosbi na mekim gut long marin sistem.

Sir Peter: El nino hevi em bikpela tru

I kam long pes 1...

Man husat i go pas long dispela fan resing em i Peter Misin. Mista Misin i tok ol poroman bilong Enga i helpim ol wantaim K260,000 long dispela fan resing.

"Dispela em i namba tu fan resing. Mipela i mekim dispela fan resing bikos drai sisen birua long Enga em i bikpela tru," Misin i tok.

Em i tok long Enga, i gat 14,000 haus we ol provinsal disasta opisa i wok long givim beg rais, tin pis na botol wara.

"Mipela i nidim moa long K3 milien long baim rais, tin pis, basket, na botol wara long sevim laip bilong manmeri.

"Dispela mani i ken sevim moa long 187,000 manmeri long ples bikos prais bilong wanpela K20 kg beg rais mipela i baim long Lae em i K75.

"Wanpela haiwe kontena i ken karim 7,000 beg rais na mani bilong haia long ol haiwe kar tu i go antap," Mista Misin i tok.

Em i tok long Kandep tasol, we bikpela bagarap i kamap, ol i givim 20,000 beg rais pinis tasol manmeri i nidim moa kaikai bikos ol i hat long planim kaikai long graun.

Em i tok ol i givim 14,000 beg rais pinis long Lagaip distrik. Ol ples Laiagam, Piliikambi, Mulitaka na Sirunki i stap long Lagaip.

Em i tok sea bilong Enga i kam long dispela K25 milien gavman i givim em i liklik mani na ol i wok long mekim dispela namba tu fan resing gen.

Sir Peter i tok em bai tokaut long Palamen na askim gavman long kamapim wanpela stet ov imejensi long PNG bikos dispela drai sisen birua em i no liklik.

No charges to call customer care from the friendlier network

Switch to bmobile-vodafone at a store near you.

76003555

www.bmobile.com.pg

Connect with us on

Sif Jastis i givim anuel ripot

EKTING Gavana Jenerel Theo Zurenuoc i kisim anuel ripot bilong nesenel judisari sevis bilong 2014.

Sif Jastis bilong Papua Niugini Sir Salamo Injia i presentim ripot bilong ol Jas long 2014 long wanela liklik seremoni long Gavman haus long asde.

Sir Salamo i tok ol i rekotim ol ripot i kam inap nau na i soim ol wok na progres bilong judisiel sevis long kantri.

Sir Salamo i tok olsem ol bikpela salens i kamap long judis-

ari sevis em spes bilong ol jas. Em i tok nau i gat 40 jas long kantri, na long dispela 15 jas i stap long Mosbi na olgeta i stap long ol provins.

Sir Salamo i tok PNG i nidim mak namel long 60 inap 80 jas long karamapim gut olgeta provins long kantri.

Tasol, Sir Salamo i amamas long ol wok i kamap pinis long kisim ol nupela jas na ol plen i kamap long kisim nupela jas na salim ol i go long ol provins.


Ripot bilong ol Jas long 2014 i

soim tu ol progres bilong konstraksen bilong nupela Kot haus long Waigani.

Em i tok proses bilong tenda na givim kontrak bilong konstraksen bilong nupela Waigani Kot haus bai i go long Sentral Saplai na Tenda Bot (CSTB) na Nesenel Eksekutiv Kaunsil (NEC) bai tok orait bipo wok i stat. Konstraksen bai stat bipo 2015 i pinis.

Ripot bilong ol Jas long 2014 bai kamap pablik bihain long em i go long palamen.

Sir Salamo Injia wantaim Ekting Gavana Jenerel, Theo Zurenuoc i soim ripot bilong ol Jas.



Tupela praim minista Peter O'Neill na Shinzo Abe i toktok long miting wantaim ol sinia gavman ofisal bilong PNG na Japan long Tokyo las wik Fonde.

Japan na PNG bai kisim visa long ples balus

PRAIM Minista Peter O'Neill i tok ol manmeri bilong PNG na Japan bai kisim visa long ples balus sapos ol i laik go kam long PNG o Japan.

Mista O'Neill i tok dispela bai mekim isi long PNG na Japan i kirapim moa bisnis namel long tupela kantri na strongim wokbung long bisnis.

Bihain long wanpela agrimen Mista O'Neill i bin sainim wantaim Praim Minista bilong Japan Shinzo Abe las wik long Tokyo, tupela praim minista i wanbel long kamapim dispela agrimen i larim moa tred, invesmen na bisnis i kamap namel long PNG na Japan.

Dispela agrimen i winim pasin bilong Australia, husat i bin lukautim PNG bipo tasol long go long Australia, PNG manmeri i save aplai long kisim visa pastaim na bihain go long Australia.

Mista O'Neill na Mista Abe i bin sainim narapela agrimen ol i kolim Invesmen Promosen na Proteksen (IPP) agrimen.

"Dispela tupela agrimen i luksave long strongpela poroman long bisnis sait tupela kantri i gat. Tupela agrimen wantaim bai sapatim ol bisnis manmeri long tupela kantri long go kam isi long tupela kantri wantaim na mekim bisnis isi," tupela praim minista i tok.

Mista O'Neill i tok tenyu long Japan long luksave long PNG olsem wanpela bisnis patna bilong en insait long Esia-Pasifik rijon.

"Dispela bai apim namba bilong Japan bisnis manmeri long kam lukluk raun long PNG na invesim moa mani long fiseris, turis, na risos sekta," Mista O'Neill i tok.

Em i tok bisnis, tred na invesmen em ol ki eria we poroman bilong tupela kantri i stap long en.

"Planti turis bilong Japan i wok long kam lukim kantri bilong yumi. Ol i kam raun long holid na bisnis raun wantaim."

"Na namba bilong ol manmeri Japan husat i wok long kam raun long PNG i wok long go antap olgeta taim," Mista O'Neill i tok.

Dispela i mekim Air Niugini i dabolim namba bilong ran bilong balus i go long Tokyo.

Mista Abe i tok Japan bai go het long bihainim dispela agrimen na mekim moa bisnis wantaim PNG.

Em i tok LNG ges bilong PNG em i wanpela namba wan samting we Japan i yusim long strongim poroman na wokbung wantaim PNG.

"Planti kampani bilong Japan i nau mekim bisnis long PNG. Sampela i bin kamap kontrekta bilong PNG LNG Projek. JX Nippon bilong Japan em i wanpela patna bilong PNG LNG Projek," Mista Abe i tok.

Em i tok tu olsem PNG LNG ges em i kamap namba wan ges we ol pipel bilong Japan i wok long yusim long kukim kaikai, kamapim pawa na mekim ol arapela samting.

Thank you **BSP!**

“BSP Home Loan helped us to purchase our first house. Our son now has his own room. We have our own kitchen and a whole yard to host a family Kaikai.”

David Jonah
First Home Buyer




A range of home loan products for first home buyers and existing home owners.

 FIRST HOME OWNERSHIP	 HOME LOAN
1. Maximum Loan K400,000	1. Flexible Loan Amount
2. Interest Rate 4% pa	2. Interest Rate 8.45% pa
3. Maximum Term 40 years	3. Maximum Term 25 years
4. Equity 10%	4. Equity 30%



320 1212 / 7030 1212 - 24/7
servicebsp@bsp.com.pg
www.bsp.com.pg





Jenerel Menesa bilong Nature Park, Michelle McGeorge na Eksekutiv Dairekta bilong ZAA, Chris Hibbard i putim Pot Mosbi Nature Park long Mep.

Nature Park Pot Mosbi i memba nau wantaim Australia na Esia

Zoo o ples bilong lukautim enimal na Akwarium Asosiesen bilong Australesia (ZAA) i tok welkam long Pot Mosbi Nature Park olsem nupela Asosiet Institusene l memba na olsem wanpela zulojikel ogenaiesen i makim PNG. ZAA em i stap namba wan long rijon we i makim ju o ples bilong lukautim enimal na akwarium komyuniti long Australia, Nu Silan na Pasifik. ZAA i save mekim ol polisi na stended long luksave olsem ol memba ples bilong lukautim enimal i go het long givim long konsevesen sains, enimal husbandri na gutpela sin-

daun bilong ol enimal. ZAA i save ripot long Wol Asosiesen bilong ol Ju na Akwarium (WAZA), bikpela indastri bilong asosiesen we i makim olsem 1, 300 ju long wol na tu ol ju i gat nem olsem ol gutpela ju long wol stret. Long kamap memba, Nature Park i mekim wok glasim we i gat rivi bilong ol polisi na enimal prektis bilong Park. Jenerel Menesa bilong Nature Park, Michelle McGeorge i tok long membaspil olsem, "Dispela i wanpela amamas taim bilong Nature Park na bilong PNG tu. Mipela i soim long ol ju long wol olsem PNG i gat

intanese nel stended long ples bilong lukautim ol enimal we i mekim tu wok bilong konsevesen na edukesen." Em i tok moa olsem rot bilong polisi developmen i bin kamap gut na i gat bikpela salens, tasol long wankain taim, em i save soim kliia fremwok na daireksen bilong pak. Long wankain taim, Presiden bilong ZAA, Kevin Tanner, i tok insait long olgeta rijonal ju memba long rijon long Institusene l Membaspil, Pot Mosbi Nature Park i mekim bikpela samting long PNG we i no bin gat wanpela wok bung long PNG insait long 20 yia. Em i amamas

long Nature Park na Zoo Viktoriya long sista-zoo patnasip we i bin kamap tripela yia i go pinis. Mis McGeorge i go long Sidni long bungim ol eksekutiv bilong ZAA long toktok long Pot Mosbi Nature Park i ken lukluk long ol rot bilong lukautim gut ol enimal long ol narapela ogenaiesen long PNG. I gat planti bisnis olsem ol hotel tasol ol no lukautim ol enimal gut. Nature Park bai holim Intanese nel Tree Kangaroo Konprens long Epril neks yia na bai toktok long ZAA Bai-Anuel konprens bai kamap long Perth long Australia long neks yia.

Kendidet bilong Human Raits Kaunsil – Bishop

KENDIDET bilong Australia long kamap memba bilong Yunaitet Nesens Human Raits Kaunsil long 2018 inap long 2020 i op nau. Dispela i namba wan taim bilong Australia long traim long kamap memba bilong Human Raits Kaunsil. Ol kendidet i bung long dispela komitmen i makim na as tingting bilong Yunivesel Dekleresen bilong Human Raits na

go het long promotim na lukautim human raits, tupela wantaim i stap long Australia na long wol. Long Kaunsel, Australia bai lukluk long rait bilong ol meri, ol gavanens na demokretik institusene, fri long toktok, fri long rilijen, human raits bilong ol asples na long wol, na ol nesene l human raits institusene. Mipela laik go het long strong long givim skul long stopim det penalti long wol, wanpela bilong

human raits objektif. Australia i tingting long makim long mekim gut long human raits, ol gutpela rot long go aut long ol sistematik luksave – wantaim luksave long Indo-Pasifik rijon. Mipela bai karim ol lo bilong luksave long taim bilong mipela long Human Raits Kaunsil, wankain luksave i kamap long taim bilong mipela olsem memba bilong UN Sekyuriti Kaunsil.

Mineral Risos Ok Tedi helpim Pidiatrik Sosaiti



(Long hankais) MRDC Kampani Seketri, Richard Aupae, ol PMGH Pidiatrisen (Han sut) Sif Pidiatrisennad Presiden bilong Pidiatrik Sosaiti bilong PNG Dokta James Amini long taim bilong kism sek long PMGH long las wik.

MINERAL Risos Ok Tedi Namba 2 (MROT), subsidiari kampani bilong Mineral Risos Developmen Kampani (MRDC) i kam insait long helpim Pidiatrik Sosaiti bilong Papua Niugini wantaim wanpela donesen wantaim mani mak inap long K10,000. Dispela sponsasip bai helpim Sosaiti long holim namba 42 Pidiatrik Medikal Simposium o bung long neks yia 2016 na tu, long helpim long baim ol ejen medikal samting bilong ol pikinini nau i stap long ol wod bilong

Pot Mosbi Jeneral Haus sik. MRDC i luksave long bikpela wok bilong Sosaiti long givim pidiatrik helt insait long kantri. MRDC Kampani Seketri, Richard Aupae i givim sek i go long Sosaiti long makim Bod bilong MROT na i tok, dispela donesen i soim olsem kampani i laik givim gutpela samting long kamapim wanpela helti na strongpela kantri bilong bihain we ol pikinini na ol pipel i gat amamas na givim helpim long developmen bilong kantri.

Dokta James Amini, Presiden bilong Pidiatrik Sosaiti bilong PNG na Sif Pidiatrisen long Pot Mosbi Jeneral Haus sik i tok dispela donesen i kam long rait taim stret long baim sampela marasin na ol narapela medikal samting we ol pikinini i ndim tru long ol wod bilong ol pikinini. "Mipela save nidim planti samting long wok bilong mipela olgeta de olsem ol tiub bilong helpim ol pikinini long kaikai, ol narapela samting na ol marasin ausait long Dipatmen Helt Saplai," Dokta Amini i tok. PMGH i gat tripela pidiatrik wod, tupela

long bikpela haus sik na wanpela em neseri long wod bilong ol mama karim. Olgeta tripela wod i save holim 200 pikinini na ol bebi long wan wan de. Pidiatrik Sosaiti i holim tu enuel Pidiatrik Simposium we bai kamap wantaim PNG Medikal Sosaiti Simposium long neks yia. Simposium bai bringim ol pidiatrik medikal speselis wantaim long toktok long painim rot bilong kamapim gut ol helt na gutpela laip bilong ol bebi long kantri na MROC i amamas long helpim.

ANG bai gat 9-pela F70 balus long 2017

AIR NIUGINI (ANG) bai i kism 9-pela Foka 70 balus long 2017 olsem hap bilong rausim ol balus i stap longpela taim. Nau yet ANG i gat tupela F70 i stap long grup bilong ol balus wantaim namba 3 balus bipo long yia i pinis. Bot Siaman bilong ANG, Sir Frederick Reiher i tok bot na menesmen bilong balus i bilip olsem ol F70 balus i gutpela bilong ikonomi bilong PNG maket bikos long ol rot ol i save wok long en a long sait bilong ikonomi. Long wankain taim, ol i bin makim ol long narapela tupela balus, Dash – 8 Q400 na ATR. F70 bai kism ples bilong Dash 8 Q400 grup bilong ol balus long ANG. Sir Frederick i tok, "F70 i gat ol bikpela gutpela samting long ol balus save gat propela olsem i gat moa sans long flai 35 pesen moa distens wantaim wankain hevi na



Bod Siaman bilong Air Niugini, Sir Frederick Reiher (lephan) na Menesing Dairekta bilong KLM City hopper, Boet Kreiken long wanpela seremoni i soim wok bung namel long ANG na KLM City hopper long kism ol F70 balus.

go hariap. Bikpela samting, gutpela renj bilong F70 i no wankain olsem Foka 100, q400 na ATR bai givim moa sans long mekim gut na kism ol sevis i go long rijinol Saut Pasifik kantri. Dispela F70 i gat bikpela rum wantaim bikpela hap bilong putim ol kago na bai kamap gut wantaim ol LED lait, ol nupela sia na Wifi Inflat Entatenmen Sistem, ol i kism setifiket na ol Foka sevis i fitim. F70 balus setelait kompas sistem na ol tel maun enjin we i

no liklik long kism long ranwe. F70 i ken kism olsem 80 pasindia, 8-pela long bisnis na 72 long ikonomi klas. Namba wan F70 i bin bung wantaim ol grup balus bilong ANG long Epril long dispela yia na narapela long Oktoba. Namba 3 bai kamap long Disemba. Taim namba wan F70 i flai long namba wan komesel flait bilong en i go long Hagen, em i makim wanpela bikpela jet balus operesen long bikpela do-

mestik rut bilong mipela, em i makim tu stat bilong bungim ol balus projek bilong Air Niugini, Sir Frederick i tok. Long wankain taim, Sir Frederick na Sif Eksekutiv Opisa bilong Air Niugini, Simon Foo i stap long Amsterdam, long bung wantaim menesmen bilong KLM City hopper, husat em ol opereta bilong F70 balus nau. Ol bai bung wantaim menesmen bilong ol Foka sevis long toktok long longpela taim sapot bilong Foka 70/100 operesen long Air Niugini.

PIH Saveman *Nius*

"I kam long Pacific International Hospital Port Moresby"

Ph: 311 3000 and 799 88000 Textline 7155 8866 Website: www.pih.com.pg

Operation of Hope & Pacific International Hospital

- At Operation Of Hope we believe every child suffering from cleft lip or cleft palate deserves exceptional surgical care.
- We dream of a world where no child suffers from lack of access to safe surgery.



EVERY 3 MINUTES,

A child is born with a cleft lip or cleft palate and may suffer from torments, malnourishment and difficulty with speech.

WHY SMILES

4-year-old Matthew was a bright boy with beautiful eyes. But to others in her village, he was an outcast and cursed because he was born with a cleft lip that left his nose, mouth and teeth disfigured.

"I just wanted to play with the other kids, but they only stared at me and laughed." - Matthew

"We did not know how to give him milk. I was worried he would die of thirst." - Matthew's Mother

When my name was called for surgery, I was so excited" Matthew said. In just an hour, Operation of Hope's skilled surgeons repaired his cleft lip and reshaped his nose, giving him hope for a better life. Today Matthew is in school, and he's confident for the first time in his life.

"OTHER KIDS ARE TELLING ME NOW THAT I LOOK BEAUTIFUL."



A new smile changed Matthew's life. There are more children who need help.

OOH-PIH 2014: a recap

In October 2014, PIH joined hands with Operation of Hope to make it a nationwide program. This involved locating the

patients, mainly through new networking through doctors as well as support from the mass media.

By early December 2014, a patient list which involved 18 patients from outside of Port Moresby plus another 11 patients from the areas in and around Port Moresby was drawn. 5 patients from Bougainville were the product of the good work of Dr. Mathias Tovilu of Buka, and another 5 patients from Lae City, Morobe through Dr. Steven James of Angau Memorial Hospital.

The Operation of Hope team from the United States began arriving in force by 12 December 2014. The team was made up of CEO Jennifer Trubenbach, 3 doctors, 3 nurses, and a medical assistant.

A number of PIH doctors and nurses assisted and the Operating Room of PIH was blocked-off during that entire week for just OOH. Four rooms at PIH were given free of charge for the OOH.

A total of 38 patients were operated on successfully in 2014.



OOH at PIH 3 Mile in 2015

Operation of Hope 2015 began with the arrival of the Surgical team on 17th Oct 2015.

In total for this year we have received 82 registrations from across the country for the lip and palate

corrections.

We screened 40 patients at PIH from Saturday 17th October and surgeries began at 7a.m on Sunday 18th October.

To date we have performed 23 surgeries and another 9 more kids will undergo the free corrections.

PIH has blocked 1 Operating theatre for the surgeries and wards have been dedicated to the children and parents. PIH is not charging the families anything for the surgeries and stay at the hospital that includes ward charges, patient consumables, food, etc. Our nurses, doctors, Operating room technicians and all hospital staff have volunteered selflessly and welcomed these children with open arms!

The PIH team is headed by Dr. Amyna Sultan OBE, Director & CEO.

She is leading a core team of 8 people from Nursing, Operations and Marketing who are managing the program.

The OOH team is lead by:

Jennifer Trubenbach, President-OOH

Mari Mori, VP-OOH

Dr. Shay Dean, MD, Surgeon

Dr. Luke Healy, MD, ER Doctor

Dr. Kevin Healy, MD, Anaesthetist

Claire Donohue, RN, OR

Kristie Bishop, RN, Ward

Esther Clark, RN, Ward

Courtney Bradley, RN, Recovery,

We are indebted to our Sponsors in 2015

Bougainville Copper Ltd, Mr. Mark Hitchcock

Brian Bell, Mr. Sean O'Toole

RH, Mr. Ivan Lu

Airlines PNG

MP Ken Fairweather

Pacific International Hospital (PIH) is the largest and only private hospital providing the most advanced tertiary healthcare services in Papua New Guinea (PNG).

The New Pacific International Hospital at 3 Mile was formally inaugurated on February 13, 2015, by Prime Minister Hon. Peter O'Neill. On May 25, 2015 PIH opened its new facility to the public and relocated from its earlier premises at 4 Mile to the new 3 Mile hospital.

The 80-bedded hospital is spread across 8000 sqm area with excellent infrastructure. PIH houses 15 specialty clinics, 6 Emergency beds, 7 ICU, 2 CT ICU, 2 NICU beds, 4 operating theatres and PNG's only cardiac cath lab and dialysis unit.

The ultramodern imaging suite includes PNG's first and only MRI, CT scan, digital x-ray, ultrasound and mammography unit.

PIH's multinational staff brings with them years of expertise from around the globe and has strong corporate governance instituted by the PIH board headed by Sir Moi Avei. The senior management team comprises of professional talent from across the globe.

Under the directions of acting CEO Dr. Amyna Sultan OBE, the hospital is looking forward to continually advance into new fields of healthcare that have been previously unavailable to the people of PNG.

Emergency Service Offered

- 24/7 Ambulance Services
- 24/7 Emergency Room
- 24/7 Emergency Trained Staff
- 24 hrs Diagnostics- Multidisciplinary Laboratory
- 24/7 Imaging Suite
- 24/7 Operating Staff
- Flagship Departments at PIH
- Cardiology and Cardiothoracic Surgery Service
- Emergency and Critical Care Service
- General and Laparoscopic Surgery Service
- Ophthalmology and Optometry Service
- Urology and Nephrology Service
- Obstetrics and Gynaecology Service
- Orthopaedics and Orthopaedic Surgery Service
- Paediatrics and Neonatology Service
- ENT Service
- Dental Service
- Family and Internal Medicine Service
- Other Services Offered
- Imaging Centre Service
- Lab and Blood Bank Service
- Health Checks and Wellness Service

Be part of the top-tier facility of your profession!!



Nurses, Midwives, and CHW welcome to apply

send your CV to supriya_hr@pihpng.com or text 7155 8866

Nupela bas bilong famili na seksuel vailens

AUSTRALIA i givim wanpela liklik bas long Famili Sapot Senta (FSC) long Pot Mosbi Jenerel Haus sik long sapotim ol pipel i abrusim famili na seksuel vailens.

Dispela liklik bas bai i bungim ol pipel abrusim vailens long ol sevis olsem Polis Famili na Seksuel Vailens Yunit, Seksuel Ofens Skwat, ol kot na ol seif haus na bekim ol askim long helpim ol long nait.

Pot Mosbi Jenerel Haus sik i wok bung wantaim Famili na Seksuel Vailens Eksen Komiti (FSVAC) bilong Konsaltiv Implementesen na Monitoring Kaunsil (CIMC) long statim dispela senta bilong ol pipel i abrusim famili na seksuel vailens long Pot Mosbi.

Dispela senta i save givim ol imejensi helt sevis, troma kaunseling



Eksekutiv Dairekta – Medikel Sevis bilong Pot Mosbi Jenerel Haus sik, Dokta Umesh Gutpa (raithan), Dairekta bilong ol Nesing Sevis, Carol Hosea (namel) na Kaunselor – Jenda na Spot bilong Australia Hai Komisn, Susan Ferguson (Iephan) i sanap fran long nupela liklik bas.

na kes menesmen sevis bilong ol pipel i abrusim famili na seksuel vailens, husat planti ol meri na pikinini.

Dispela senta i helpim olsem 500 pipel namel long Januari na Jun long

dispela yia. Namba bilong ol pipel i painim helpim i go bikpela. Senta i helpim 76 pipel long Januari 2015, skelim wantaim 19 Januari long 2014.

Pasifik Wimen Seping Pasifik Developmen pro-

gram bilong Australia i givim dispela liklik bas. Australia i helpim haus sik long painim aut hap bilong mekim gut dispela senta long helpim planti askim bilong ol pipel.

Insait long dispela Pasifik Wimen Seping

Pasifik Developmen program, Australia bai yusim \$58 milien long 5-pela yia long PNG long ol program bilong daunim famili na seksuel vailens na mekim gut long lidasip na sans bilong ol meri.

Ol meri i kirapim pasin bilong yuniti

Esther Bralyn Wani i raitim

OL olupela sumatin bilong Notre Dame Sekenderi o pastaim hai skul we em skul bilong ol meri tasol long Westen Hailans provins i kamap wantaim wanpela tingting long kirapim spirit bilong Notre Dame.

Dispela grup ol i givim nem bilong en, Notre Dame Alumnae long bungim olgeta olupela sumatin bilong Notre Dame taim skul i bin stat inap nau.

Notre Dame i kamapim sampela strongpela meri long kantri i kamap dokta, pilot, akaunten, loya, ol bisnis meri, tisa, menesa na planti moa.

Em i tru olsem ol dispela meri i pinis long sampela yunivesiti o kolis tasol Notre Dame i kamap faundesen bilong ol long hat wok bilong ol sampela ol tisa na ol het tisa long narapela kantri olsem ol Sista.

Long dispela, ol i statim dispela grup long kirapim dispela spirit bilong Notre Dame na bungim gen ol sumatin long hap. Na tu long mekim sampela gutpela samting long kantri bihain.



Ol olupela sumatin bilong Notre Dame i bungim gen ol pren bilong ol na mekim liklik bung long Adventure Pak ausait long Pot Mosbi.

Ripot long Tol Fri namba i no tru

KODINETA bilong Nesanel Famili na Seksuel Vailens Eksen Komiti (FSVAC), Ume Wainetti, i tok long 50 pesen mak bilong ol pipel i save ringim 1-Tok Kaunselim Helpim Lain em ol pipel ausait long Nesanel Kapitol Distrik (NCD).

Mis Wainetta i tok dispela 1-Tok Kaunselim Helpim Lain i gat gutpela netwok long kantri na ol i save isi long salim ol pipel i ring i go long ol patna na

ol pipel husat i save givim sevis long kantri long husat i ring ausait long NCD.

Nesanel Kodineta bilong FSVAC i mekim dispela toktok long bekim wanpela nius ripot i kamapwe i tok olsem dispela Tol Fri Sevis i no wok.

“Dispela 1-Tok Kaunselim Helpim Lain em i wanpela fri namba, we i save wok long 8 klok inap 5 klok long apinun na klostu

bai ol i givim sevis long 7 klok long moning inap 7 klok long nait.

Wainetta i salim tok i go aut long husat i no wok bung wantaim FSVAC long ol provins long bung na bai ol i ken isi long salim ol pipel i kisim bagarap i go long FSVAC rot.

Em i tok Jenda Bes Vailens Human Raits Sempion Siaman, Owen Saria, i mas traim long joinim FSVAC patnasip

long ol provins long wanem em i ken konek long dispela rot.

Long wankain taim, Child Fund Senia Kaunselor bilong 1-Tok Kaunselim Helpim Lain, Penny Sage-embo, i tok olsem dispela 1-Tok Kaunselim Helpim Lain em i stap tupela mun tasol i helpim moa long 200 pipel pinis.

“Mipela i kisim ol pipel i ring insait long NCD na tu, ol pipel i ring long 22 provins long kantri. Mipela i save givim

Kraisis Kaunseling, Sefti Plening, na tu givim ol infomesen long ol sevis i stap long helpim ol na ol pipel i save ring long telepon,” Sage-embo i tok.

Em i tok ol pipel i ring ausait long NCD, ol i save salim ol kol i go long ol pipel i givim sevis long Patna Sevis long provins ol i ring long en.

Em i tok moa olsem dispela patnasip em i op long wanem grup o ogenaisesen i laik joinim.

SP Brewery i sapotim MPIP

MIS Pasifik Ailan Pejen (MPIP) i ogenaisim ol meri long painim wanpela kalsarel embeseda bai ol i mekim em kwin Novemba 14 long Crown Palza Hotel.

Husat i winim dispela resis bai makim PNG long MPIP long Cook Ailan long Disemba. Bipo long dispela, MPIP Projek Ranwe bai kamap long Sarere 31 Oktoba long givim sans long ol disaina long soim ol wok bilong ol long ol MPIP PNG meri bai resis long kamap kwin.

Ol disaina bai gat sans long soim ol tupela wok o disain, wanpela ples klos, na wanpela sarong. Husat i winim dispela disain resis bai meri i resis long MPIP bai werim disain bilong en long MPIP long Rarotonga long Cook Ailan.

Husat i winim dispela disaina resis bai i winim prais mani na bai go wantaim MPIP PNG meri bai resis long Cook Ailan.

Siameri bilong MPIP PNG, Katherine Johnston i tok, ‘Long makim komiti bilong mi, mi laik tok tenkyu long SP Brewery long sapotim MPIP PNG long dispela yia. Dispela resis i no wanpela hap bilong givim ol yangpela meri sans long kamap olsem kalsarel embeseda long kantri bilong ol; tasol em i save kamapim mani bilong skolasip long helpim ol yangpela meri long pinisim skul bilong ol long teseri na kolis long kantri.’

Mis Johnston i tok long bikpela piksa, dispela resis i makim long kisim luksave long ol Pasifik kantri, na kisim i go long pablik long ol rijon na pulim ol turis.’

‘Ol sponsa olsem SP Brewery i soim trupela pasin bilong wok bung wantaim long strongim ol yangpela meri bilong yumi. Mipela i bilip olsem edukesen em i nambawan wan samting long gutpela sindaun na gutpela bilong kantri. Mipela i bilip olsem taim yu eduketim wanpela meri, yu skulim wanpela komyuniti, wanpela provins, na wanpela kantri,’ Mis Johnston i tok.

BSP i sapotim Mis Pasifik Ailan Pejen



Mis BSP, Samantha Vulum

BENK Saut Pasifik (BSP) i tokaut long Samantha Vulum olsem Mis BSP long 2015 Mis Pasifik Ailan Pejen (MPIP) PNG.

BSP Grup Jenerel Menesa, Riteil Benking, Paul Thorton i tok dispela ogenaisesen i amamas long wok bung wantaim wanpela yangpela

meri bai resis i kamapim na soim strongpela save bilong ol yangpela meri na ol pasin bilong kalsa.

‘Long BSP, mipela i bilip olsem ol pipel i stap long lewa bilong olgeta samting mipela i save mekim. Mipela i bilip long bildim wanpela wok ples bilong olgeta na givim awat long husat i wok gut.

Samantha em i wanpela yangpela meri husat i save bilip olsem olgeta Papua Niugini meri, yangpela o lapun i gat rait na sans long kisim gutpela edukesen.

Long BSP, ol i save bilip long bildim ol woklain na givim wankain sans long wok bilong ol long ol indastri, long ol meri. Dispela em samting mipela i amamas long en, na mipela i amamas long sapotim gutpela wok olsem na sponsa long Samantha.

Long wankain taim, Mis Vulum i tok, ‘Mi i ken sapotim dispela pasin we MPIP PNG i makim long kamapim mani bilong skolasip long helpim ol yangpela meri long pinisim edukesen long ol teseri institusen long kantri olgeta yia.’

Em i tok moa olgeta em i amamas long joinim dispela benk i save mekim bikpela senis i no long bisnis tasol long ol komyuniti long kantri tu.



Ol CS opisa i redi long kisim setifiket pepa bilong ol bihain long ol i pinisim wanpela 4-wik trenin long Bomana CS trenin kolis ausait long Pot Mosbi las wik Fraide.

KOREKSENAL Sevis o CS i trenin ol ki opisa husat i save lukautim ol haus kalabus bilong PNG.

Dispela trenin i bin lukim moa long 87 opisa i kisim nupela trenin long mekim wok bilong ol gut. Namel long planti man, 17 meri opisa tu i bin kam kisim trenin na ol i pas aut wantaim setifiket.

Planti ol dispela opisa i save wok olsem sajen na sajen meja. Ol i save mekim namba wan wok bi-

long lukautim ol kalabus manmeri long 19 haus kalabus insait long PNG.

Bihain long 4-pela wik trenin, ol dispela opisa i pas aut las wik Fraide long Bomana CS Trenin Kolis.

Wanpela kos instrakta or tisa long Bomana Superintenden David Suagu i tok wanpela as long kamapim dispela trenin em long larim ol opisa i kisim nupela save na larim ol i save gut long wok bi-

long ol.

“Ol dispela opisa i kam long 19 haus kalabus long PNG. Ol i ki manmeri husat i lukautim ol kalabus manmeri na ol i wanbel tru long kisim dispela trenin,” Mista Suagu i tok.

Em i tok planti taim ol kalabus man i save brukim haus kalabus na i go aut. Wanpela rot long stopim dispela kain pasin long ol haus kalabus insait long kantri em long trenin ol CS opisa gut na larim ol

CS trenin 87 opisa

mekim wok bilong ol gut.

“Wok bilong ol dispela opisa em long lukautim gut haus kalabus na larim ol lukautim gut ol kalabus man,” Mista Suagu i tok.

Em i tok CS trenin kolis long Bomana i bin luksave long dispela nid long yia 2012 na nau ol i wok long kamapim ol nupela trenin long strongim opisa bilong ol long olgeta hap long kantri.

Ekting deputi komisina Dennis Piandi i salensim ol dispela opisa na tokim ol long yusim dispela save long mekim wok gut.

“Wanem samting yupela i lainim tude bai kamap nambawan samting long wokples bilong yupela. Lukautim ol haus kalabus gut,” Mista Piandi i tok.

Mista Piandi i tok sampela ol sinia opisa bilong CS bai risain o lusim wok klostu taim.

“Taim mipela i lusim wok, yupela bai kisim ples bilong mipela. CS bai stap long han bilong yupela. Yupela bai kisim lidasip wok bilong CS na

mi amamas olsem planti bilong yupela i bin skul gut na kisim dispela trenin gut,” em i tok.

Sejen Mari Yakuc, wanpela bilong dispela 17 opisa meri, i makim maus bilong dispela 87 opisa na i tok tenkyu long ol i kisim dispela trenin.

“Planti bilong mipela i no bin go skul long bikpela skul. Dispela trenin i givim mipela sans long save gut long nupela samting we mipela i nidim long karimaut CS wok gut long wanem haus kalabus mipela i wok long en,” em i tok.

Sejen Yakuc i tok ol sinia opisa na trena long Bomana i bin tisim ol gut tru stret na ol i bin amamas stret long skul gen insait long dispela 4-pela wik.

“Yupela i bin lainim mipela wantaim nupela save. Dispela bai mekim mipela fit stret na strongim mipela long lukautim ol haus kalabus bilong yumi long PNG na senisim pasin nogut bilong ol kalabus manmeri,” em i tok.

Koreksenal Sevis (CS) bai kirapim bek haus kalabus long Galp

PAPUA Niugini Koreksenal Sevis (CS) i laik kirapim gen wok bilong en long Galp Provins.

Dispela tingting i bin kamap ples klia long taim Komisina Michael Waipo na Galp Edministreta Marc Orisuru Avai i bung toktok long Kerema taun las wik Fonde.

Insait long dispela miting long Galp Edministresen opis, Mista Avai i tok tenkyu long Komisina Waipo long em yet i go lukluk raun long Kerema taun na em i tok moa olsem Gavana bilong Galp na Edministresen i gat strongpela tingting long kirapim bek Koreksenal Sevis long Galp.

Bilong strongim dispela tingting, Mista Avai i tokim Komisina Waipo wantaim ol deligesen bi-

long em olsem i gat graun i stap long Amora (200 hekta) we ol i bin makim bilong kirapim bek Galp CS. Long wankain taim tu Komisina Waipo i tok tenkyu long Galp Edministresen na Gavana long tok strong yet long luksave long kirapim bek Koreksenal Sevis long provins.

“Koreksenal sevis em i gat wok aninit long lo long em i stap olsem han bilong lo na jastis long wokim gutpela wok bilong koreksenal sevis long provins. Tasol, dispela em i no stap nau long Galp provins,” em i tok.

Komisina Waipo i tok moa olsem i gat 9-pela haus kalabus long kantri, na Galp Provins em i wanpela bilong ol we i stap long plen bilong kirapim na stretim gen aninit long Prabrik

Praivet Patnasip (PPP) na em bai kamap pastaim long 2019.

Ol rekot bilong CS i soim olsem i bin gat wanpela CS wok i stap long provins long 1982. Tasol hevi bilong graun i mekim na CS i stopim wok long hap inap 20 yia olgeta. Long 2003 CS i go bek gen na putim wanpela haus kalabus long provins tasol hevi bilong papa graun namel long tupela klen Womai na Silo i mekim na ol wok i stop gen.

Tasol nau long dispela miting, provinsal edministresen loiya i tokaut olsem dispela hap ol i laik kirapim wok gen em graun bilong gavman.

Dairekta bilong Sauten Rijon, Henry Wavik i tok Koreksenal Sevis i laik kirapim haus kalabus long provins bikos dispela

em i wanpela hap i lus long lo na jastis sekta bilong provins.

Kamanda bilong Bomana Haus Kalabus, Ekting Sif Suprintenden Kiddy Keko, tu i bin stap na i tokaut olsem moa long hap namba bilong ol kalabus lain long Bomana em asples bilong ol i stap long Galp. Sapos Galp haus kalabus i kirap gen, ol bai inap long salim ol dispela lain i go bek gen long Galp haus kalabus we ol famili bilong ol bai isi long lukim ol.

Komanda i tok gen olsem dispela singaut i kamap long taim stret bikos em bai helpim ol kalabus lain long ol pro-

gram bilong Parol, Probesen na Rikon siliesen we bai ol i ken mekim wantaim ol komyuniti na ol narapela stekholda long hap we trabel i bin kamap.

Komisina Waipo i givim tok orait long dispela petisen bai go long Galp Edministreta, Mista Avai. Mista Avai i tok dispela bai kamap wanpela hap insait long sabmisen bilong ol we bai go long Gavana na kabinet long lukluk na kirapim bek haus kalabus long Galp.

Dispela bai daunim ol bikpela kost bilong prosesim na karim ol lain bilong kot na ol kalabus lain i go i kam long provins i go long nesenel kot seket siting.

KCH na PNG Difens Fos i sainim agrimen

KUMUL Konsolidet Holdings (KCH) na Papua Niugini Difens Fos (PNGDF) i sainim wanpela memorandam bilong andastanding (MoU) long wok bung long senisim hap bilong HMPNGS Basilisk maritaim bes i stap long sait bilong solwara long Pot Mosbi.

Dispela agrimen bai opim rot bilong developim gen sait bilong solwara long Mosbi.

Menesing Dairekta bilong Kumul Konsolidet Holdings, Garry Hersey i tok, “Dispela MoU i bihainim Motukea we PNG Ports i kisim. Em i wanpela bikpela hap bilong developim gen watafran bilong Mosbi. Em i hap bilong wanpela projek mipela i wok long en we bai soim Pot Mosbi na PNG long wol.

Long senisim hap bilong PNGDF i go long narapela hap bai i bungim ol narapela Difens Fos hap na givim ol gutpela hap bilong ol long putim sip, putim fiul, haus bilong ol na edministresen bai stap longwe long siti.”

“Dispela em i gutpela taim bilong KCH na PNGDF. Kumul Konsolidet Holdings i baim dispela nevi hap bai larim Lakatoi Siti Projek i go bikpela long sait bilong solwara. Em bai givim ol pipel i slip long hap, wanpela hap long rileks, ol entatenmen, ol haus, ol hotel na kaikai haus bai stap long en.

Long wankain taim, Komanda bilong PNGDF, Brigedia Jenerel Gilbert Toropo i tok, “Long PNGDF, dispela em i narapela kain iven we

mipela i lukluk long developim na mekim gen ogenaisesen bilong PNGDF. Dispela hap bilong Basilisk Maritaim Bes i soim gutpela sapot bilong gavman na ol pipel long mekim wok bilong ol yet.”

Tasol, em i tok ol i no inap muv inap ol i painim wanpela nupela hap na propeti i stap. Em i tok dispela MoU em namba wan hap bilong en.

Dispela MoU i gat wanpela hap bilong tupela i wok bung wantaim long kamapim wanpela bisnis kes long salim nevi bes na painim nupela hap.

Komanda bilong PNGDF, Gilbert Toropo wantaim Menesing Dairekta bilong KCH, Garry Hersey i sainim dispela MoU.



Komisina Waipo (namba tu long hankais) sanap wantaim Galp Edministreta Marc O. Avai (namba 3 long hankais) na Deputi Edministreta Emmanuel Xavier (hankais) na Komanda Kiddy Keko, Dairekta Sauten, Henry Wavik na Dairekta Hailans, Philp Eka bihain long miting. Foto: Insp. Richard Mandui CS Midia A/Dairekta

PIH opim dua long Operesen bilong Hop

Frieda Sila Kana i raitim

PASIFIK Intenesenel Haus Sik (PIH) wanpela moa taim i opim dua long Operesen bilong Hop, wanpela NGO bilong wok mari-mari long Yunaitet Stets bilong Amerika long kam namba tu taim na stretim ol pikinini na bikpela lain husat i kamap wantaim maus na nek i op long taim mama i karim ol.

Sif Eksekutiv Opisa na Tim Lida bilong Operesen Hop, Jennifer Trubenbach i bin kamap long Fonde las wik long redim ples bilong ol narapela lain bilong em long kam.

Operesen bilong Hop em i bin kam long Pot Mosbi long las yia Desemba na stretim ol liklik pikinini wantaim maus i bruk na nek paip i op bilong wanem mama i karim ol osem .

Mis Trubenbach i amamas tru long wok bilong PIH long opim dua na bringim ol dispela siklain i kam na tu long ol media long toksave i go



Casen Tapie bilong Simbu, i bin stap redi long kisim Operesen long las wik Sande. Long hia em tim lida Jennifer Trubenbach i holim Casen na Dokta Jonathan Oblefias bilong PIH i stap wantaim ol. Foto: PIH Marketing

long pablik long dispela sevis, bilong wanem nau ol i kisim 80 lain long rejista pastaim long ol dokta i kam kamap. Tasol PIH i givim spes inap tasol long ol tim i ken lukim na stretim 35 siklain.

Mis Trubenbach i tokim Wantok

Niuspepa long las wik Fraide olsem nau ol i tingting long givim moa luksave long ol bikpela pikinini wantaim ol bikpela man meri pastaim na bihain ol liklik pikinini, long taim ol i makim ol 35 sikman, meri na pikinini long stretim pes bilong ol.

“Mipela i laik givim prairiti long ol bikpela lain bikos ol i stap olsem longpela taim na ol i bin karim sem na hevi bilong dispela pinis. Em i gutpela long mipela i helpim ol long gat gutpela tingting long ol yet na long lukluk bilong ol narapela. Ol liklik pikinini i gat sans yet i stap sapos ol i no kisim helpim long dispela taim,” Mis Trubenbach i tok.

Insait long tim bilong ol dokta i kam i gat wanpela sejen o dokta bilong katim sikman, wanpela anestetisen, dokta bilong givim marasin bilong mekim sikman i slip long taim bilong operesen, wanpela nes bilong wet long sikman i kirap na helpim em, tupela wod nes na wanpela narapela meri long helpim CEO em wanpela pikinini meri bilong em yet.

PIH i givim wanpela operesen tieta na 35 bet olsem na ol i no inap long kisim moa long 35 siklain long wanpela taim.

Mis Trubenbach i tok tenkyu tru long PIH na ol sponso olsem Rio Tinto, Brian Bell na ol narapela gut-

pela lain olsem, Airlines PNG, RH Grup, Opis bilong Wes Nu Briten Gavana, Hodava hotel, FM-100, Laila Faundesen na Tasty Bite em ol lain husat i bin helpim long yia i go pinis.

Em i tok, dispela kain operesen bilong wanpela pikinini tasol long Yunaitet Stets em save go long mani mak bilong US\$35,000 bilong maus i bruk long ausat tasol US\$80,000 sapos ol dokta i samapim maus na nek insait wantaim. Tasol long hia, ol sik pikinini na ol bikpela lain i no baim wanpela kos bilong operesen bilong ol. No gat, em i fri olgeta!

Mipela i kisim tok save olsem ol dispela tim bilong Amerika em i kam olsem volantia na ol i no kisim pe long mekim dispela wok. Olsem na ol i nidim yet sampela helpim bilong baim ples slip bilong ol na long transpot bilong kisim ol i go i kam long hotel na haus sik em bai gutpela tru.

Ol tim bai pinisim wok bilong ol long tumora na go bek gen long Yunaitet Stets.

Katim gras bilong Kastu kamapim K12,000

Frieda Sila Kana i raitim

HAUS sik Poroman, wanpela marimari NGO long Pot Mosbi long Fraide 16 Oktoba las wik i kamapim wanpela moa bikpela fanresing bilong helpim ol tarangu sik pikinini bilong Pot Mosbi Jeneral Haus sik, na long helpim Kimbe Haus sik,

Fan resing i bin kamap long Getwe i lukim planti man meri i kamap we ol i bin baim kaikai long wan wan tebol bilong kamapim mani bilong helpim Kimbe Haus sik. Tasol long wankain nait tu ol i bin tokaut long narapela fanresing we bai kamap long Desemba 11 na 12 long Lamana Hotel.

Long dispela taim, Trends Hair Saloon bai katim gras, wokim saku o kela long het na tu long penim gras long kisim sponso mani na givim long Pot Mosbi Jeneral Haus sik, wod bilong ol pikinini we i save lukautim

ol pikinini i gat kensa. Long dispela nait yet taim ol i tokaut long dispela fan resing bilong kensa, Kastu Turner Arifeae bilong 93FM/Yumi FM, husat i bin Masta bilong Seremoni long dispela nait, i bin volantia long wanpela meri long Trends Hair Saloon i katim gras bilong em i go daun sot long statim dispela fan resing.

Mista Kastu em i laki long wanem long dispela nait yet em i kamapim K12,000 bilong helpim ol pikinini i gat kensa na nau i stap long Pot Mosbi Jeneral Haus sik. Ol lain i bin sponso long Mista Kastu em, Gavana bilong NCD, Powes Parkop husat i bin putim K3,000 promis mani, Gavana bilong Sentral Benk, Loi Bakani husat i tok promis long putim tu K3,000, Westpac Benk i putim K1,000, Ruth Waram bilong Oil Search Ltd i putim K2,000 bilong rausim nus gras bilong Kastu, na

Kunai Strit Auto Part i putim wanpela K3,000 long rausim namel gras long het bilong Mista Kastu.

Faunda na deputi siameri bilong HPF, Janet Sios i tok save olsem i gat ol rejistresen pepa i stap long ol pablik husat i laik go insait long kamapim sampela mani na bihain katim gras o penim gras bilong mekim dispela gutpela wok.

Siaman bilong Faundes, Charlie Gorogo i tok, Haus Sik Poroman em i gat 4-pela memba tasol wantaim planti volantia husat i save helpim long kamapim ol mani bilong gutpela wok bilong helpim ol haus sik. I gat tupela bikpela tingting we Haus sik Poroman i save mekim.

Namba wan long autim tok bilong gutpela helt na laip stail sik, pablik awenes na haus sik na maket na namba tu em long helpim ol haus sik long baim ol samting we

bai givim gutpela sevis na saplai.

Insait long 4-pela yia we Haus Sik Poroman i bin stap, ol i bin helpim pinis Namatanai na Kavieng haus sik, Samarai Medikol Senta, las yia ol fanresing i bin helpim Popondetta Jeneral Haus sik na las wik em bilong Kimbe Provinsal Haus sik.

Long taim ol i stat, planti singaut i wok long kam long helpim, tasol Mista Gorogo i tok, ol inap tasol long helpim sampela lain.

Em i tok gutpela sapat i bin kam long ol bisnis haus na ol media long gutpela wok kamap long bringim toksave i go aut longwe.

Haus Sik Poroman i save wok wantaim ol biknem ragbi pilaia bilong pukpuk tim na bikpela ragbi sta bilong NRL, Will Genia long strongim wok bilong tokaut long dispela gutpela wok.



Wanpela wokmeri bilong Trends i redi long katim gras bilong Kastu Turner Arifeae bilong 93FM/Yumi FM long statim fanresing bilong PMGH kensa wod bilong ol pikinini. Foto: Frieda Sila Kana

Famili Plening Edvokasi Bung bilong Bogenvil



Famili i Plening Edvokasi Bung bilong Bogenvil.

YUNAITET Nesen Populesen Fan (UNFPA) i bung wantaim Nesenel Dipatmen bilong Helt (DoH) na Bogenvil Dipatmen bilong Helt long kamapim wanpela bikpela Famili Plening Edvokasi Miting long Atonomas Rijon bilong Bogenvil (AROB) long stat bilong dispela mun.

UNFPA, wantaim Nesenel Dipatmen bilong Helt (NDOH) na Bogenvil Dipatmen bilong Helt i bin holim wanpela tupela de edvokasi miting long Buka long toktok long ol maternal helt, famili plening,

adolesen seksual na riprodaktiv helt, na populesen na jenda.

Long Bogenvil, moa long 60 pesen bilong ol pipel em ol yangpela lain na em i wankain tasol long ol narapela hap bilong Papua Niugini. Ol bikpela meri na ol yangpela meri i save gat wankain hatwok tasol long sait bilong kisim helpim long matanel helt na famili plening sevis. Planti bilong ol i save dai nating long taim bilong karim pikinini, o bihain tasol long ol i karim.

Bikpela toktok long miting em “Pikinini kamap

wantaim laik na i no kamap nating” i tok save moa long bungim tingting bilong famili plening na riprodaktiv helt sevis long AROB. Moa long 70 man na meri i kamap long dispela bung. Ol distrik edministreta na helt opisa wantaim lokal level gavman siaman, viles sif, na ripresentativ bilong ol yut grup, grup bilong ol man, sios na non-gavman oge-naisesen.

Ol lain husat i kisim trening i toktok long ol salens na samting i save pasim rot bilong ol long wok bilong famili plening

na populesen long Bogenvil na long painim wanem kain rot bilong skruim toksve i go moa.

“Famili plening em i gutpela we tu long stretim ol dispela hevi we ol pipel bilong Bogenvil i wok long bungim nau.

Famili Plening i no bilong plenim tasol hamas pikinini long tupela marit bai gat, no gat. Em i karamapim tu tingting bilong givim planti sans long ol meri long makim kos bilong laip bilong ol,” Mista Walter Mendonca Filho, Man i makim UNFPA long Papua Niugini i tok.

Klap bilong ol Raita i kisim donesen



Pater Harry Gahare na Katherine Epikana i soim Crocodile Prais Antoloji 2015.

WANPELA klap i kamap nau tasol long developim na kamapim wanpela kalsa bilong rit na rait namel long ol sumatin i kisim donesen long wanpela bikpela literi kompetisen antoloji.

Ol Diwain Wot Yuni- vesiti (DWU) Raita na Rita klap i amamas long kisim 9-pela The Crocodile Prais Antoloji 2015 buk long yunivesiti long Madang.

Leksera bilong Sosol na Rilijes Stadis na man i statim klap, Pater Harry Gahare i tok ol atikel bilong ol raita long Papua Niugini i stap insait long dispela buk bai i strongim ol sumatin husat i stap insait long dispela klap.

Pater Gahare i tok 22 wokman na meri na ol sumatin i stap insait long dispela klap bai go het resis na helpim long promotim wanpela rit na rait

kalsa long PNG.

Pater Gahare i tok wanpela sumatin Amanda Yeou husat i save givim long PNG Attitude blog i kisim wari bilong klap i go long wanpela edita, Keith Jackson husat i sapotim em na givim ol buk long karim aut kalsa bilong rait.

I no ol sumatin tasol i karim aut kalsa bilong rait tasol ol woklain tu i stap insait long dispela. Leksera bilong Intanesenel Rilesen na memba bilong The Crocodile Prais Ogenaising Grup, Bernard Yegiora i kam bek long wanpela raun long Simbu long Crocodile Prais Awat bilong dispela yia.

Mista Yegiora i serim ol eksperiens bilong em long wanem rot dispela klap i ken helpim planti long developim pasin bilong rait na rit.

Long wankain taim,

Mista Yegiora i givim tupela buk long makim klap i go long Friendship Library bihain.

Ol buks Mista Jackson i givim ol i skelim namel long ol sumatin na ol woklain.

Pater Gahare i bilip olsem dispela klap bai go het long givim ol stori long Crocodile Prais Antoloji long bihain taim na bai go pablisim ol stori bilong ol yet insait long DWU Press.

Dispela grup i stat nau tasol, ol i givim wok long ol long go pas long oge- naisim Crocodile Prais Awat long neks yia na Semina bai i kamap long DWU.

Long wankain taim, klap i go het long wok long rejisterim klap olsem wanpela asosiesen husat i wok bilong en yet long yuni- vesiti tasol aninit long Fekalti bilong Ats na Sosol Sains.

Nupela grensten bilong skul bai gat planti wok

MANUS Sekenderi Skul i gat nupela grensten long yusim long kain wok we Benk Saut Pasifik (BSP) i bildim long mekim ol presentesen na yusim long spot.

Ol sumatin, tisa, ol papamama na komyuniti i amamas na tok tenkyu long BSP long bildim dispela grensten na givim ol.

Prinsipel bilong skul, Alois Kinol, i tok tenkyu long BSP Lorengau long dispela projek na em i tok dispela fasiliti bai helpim long sait bilong spot bilong ol sumatin na komyuniti.

'Tenkyu BSP, dispela nupela fasiliti bai givim bikpela helpim long mipela. Mipela bai gat



Nupela grensten bilong Manus Sekonderi Skul.

hap bilong putim ol pipel bai lukim gem long taim bilong ol skul kanivel o ol provinsal iven. Na tu long pinis bilong gem bai mipela gat gutpela hap bilong mekim presentesen.

Dispela projek i kisim tupela mun long pinis we ol woklain i yusim wiken bilong ol long klinim ol fil na helpim long konstraksen bilong stan.

Long wankain taim,

Lorengau Menesa bilong BSP, Quillan Nongi, i tok, 'Spots em i bikpela samting long developmen na mipela i amamas long givim wanpela samting we bai helpim komyuniti.'

Nupela buk i op long soim agrimen

PAPUA Niugini i lukim ol kalsa i bagarap bikos long ol wol i senis na planti samting long ausait i senisim ol samting long sait bilong rilijen, edukesen, ol developmen na envairomen senis.

Long dispela, Nesenel Kalsarel Komisin i go insait long wanpela agrimen wantaim Intanesenel Infomesen na Netwoking Senta bilong Intanjibel Kalsarel Heritej long Esia-Pasifik Rijon aninit long lukaut bilong UNESCO (ICHCAP) long lukautim intejibel o i no strong kalsarel heritej (ICH) bilong PNG.

Dispela agrimen i kamap bihain long buk i op long namba wan bung projek wantaim ol 6-pela Pasifik kantri olsem PNG, Fiji, Palau,

FSM, Tonga, Vanuatu na ICHCAP long hap bilong ICH.

Ol i plenim dispela projek na kamapim wantaim spirit bilong bung wantaim na rispek. Dispela buk i bin op long taim bilong Saut Pasifik Forum (PIF) long Septemba 10 long dispela. ICHCAP i sponsaim dispela buk pablikesen na program bilong opim.

Het tok bilong buk em, Traditional Knowledge and Wisdom. Themes from Pacific Islands (2014) we i gat ol wok bilong ol man long save bilong ples na gutpela tingting long ol so- saiti long Pasifik ailan.

Ol raita o man i save raitim buk long 16 Pasifik ailan kantri i raitim ol atikel aninit long ol

sampela het tok. Wanem samting i stap insait long buk i toktok long tradisenel save we ol i mekim yet long wan wan kantri na PNG tu.

Long PNG, Dokta Jacob Simet, Dokta Don Niles, Naomi Faik- Simet, na Profesa Steven Winduo i raitim ol sampela atikel. Olsem 80 kopi bilong ol buk ol i karim long Korea i kam long opim na bai ol i putim long ol laibri long PNG.

Long taim bilong opim buk, Asisten Dairekta-Jenerel bilong ICHCAP, Dokta Seong- York Park na Program Speselis bilong Kalsa long UNESCO Opis bi- long Pasifik Stet long Apia, Samoa, Dokta

Akatsuki Takahashi i kam long kantri long toktok.

Ol narapela bikpela spika long dispela buk i op em, Dokta Jacob Simet, Eksekutiv Dairekta bilong Nesenel Kalsarel Komisin (NCC); Dokta Don Niles, Dairekta bilong Institut bilong PNG Stadis (IPNGS); na Charles Abel, Ekting Minista bilong Opis bilong Turisim, At na Kalsa long opim buk.

Nesenel Kalsarel Komisin i amamas long ICHCAP long kamapim, developim na givim mani long dispela bung projek na long makim na givim PNG dispela sans long opim dispela namba wan pablikesen projek namel long ol narapela kantri.

Bogenvil i redi long statim alumni netwok

MAN i makim Australia Hai Komisin, Tim Bryson na Presiden bilong PNG Australia Alumni Asosiesen (PNGAAA), Dokta Teatulohi Matainaho i opim nupela Atonomos Rijon bilong Bogenvil (ARoB) Sapta bilong PNG Australia Alumni Asosiesen long Arawa.

"Dispela nupela PNGAAA Sapta i givim wanpela sans bilong ol pipel long Bogenvil i mekim gut husat i stadi long Australia long developim na developim netwok wantaim ol narapela alumni o ol man bilong PNG i bin skul long Australia long olgeta hap insait long PNG," Mista Bryson i tok.

ARoB sapta em i bikpela hap bilong PNG Australia Australia Alumni netwok, wantaim ol sapta o han long Lae, Kokopo, Madang, Goroko, Manus na Enga.

Long wankain taim, Dokta Matainaho i tok, PNGAAA i wanpela strongpela grup bilong ol pipel



Profesa Matainaho (lephan) na Tim Bryson, (namel long beksait) wantaim sampela ol memba bilong PNGAAA-ARoB Sapta.

long PNG i karamapim ol pablik sevis, praiwet bisnis na sivil sosaiti. Ol sapta bilong mipela em ol bikpela samting long alumni long

sapotim ol grasrut developmen long ol provins.

Dispela ARoB Sapta bai kamap olsem namel hap bilong infomesen

long ol Australia Awat Skolasip na givim ol memba wantaim profesenel developmen trening na gat rot bilong kisim ol liklik grent program.

Gavman bilong Australia i sapotim namba wan yia bilong PNGAAA membasip long olgeta husat i winim awat i kam bek long wanpela Australia Awat Skolasip.

Inap long 2010, olsem 30 pipel long Bogenvil i stadi long Australia. Presiden bilong ARoB Sapta, Jezreel Ivomari i tok welkam long helpim bilong Australia gavman.

"Insait long ol Australia Awat skolasip, na stat bilong dispela Sapta mipela ken kisim trening ol i nidim na givim ol grent long rijon na tu painim aut na givim skul toktok long ol narapela jeneresen bilong ol lida," Mista Ivomari i tok.

Dispela PNGAAA i bin stat long 2006 long givim ol pipel long PNG husat i bin stadi long Australia wantaim ol samting bilong yusim save na lidasip skil bilong ol long givim long developmen long PNG. PNGAAA i gat olsem 600 moa memba long kantri na ol Sapta long 7-pela provins.



KOMENTRI

PNG i no gat taim long toktok long vot i no gat bilip

Palamen bai bung gen long dispela mun. Namba wan agenda bilong dispela bung em long givim tok orait long saplamenti baset bilong dispela yia. Mani i sot olsem na gavman i mas stretim dispela hevi hariap. Tasol i gat toktok i kamap pinis olsem Oposisen bai putim mosen long vot i no gat bilip long praim minista na gavman. Dispela mosen bilong ol bai kamap tru nogat?

Politiks long PNG i gat kain kain pes bilong en. Yumi lukim eksampel bilong wanpela bikpela politikal pati we i gat moa memba i winim ol arapela. Yumi lukim eksampel we i no gat inap memba long Oposisen long kamapim ol gutpela dibet na blokim ol samting gavman i laik kamapim. Na yumi lukim tu planti ol arapela memba husat i pasim maus tasol na stap isi bikos ol i no laik kamap birua bilong gavman. Ol i luksave pinis olsem sapos ol i mekim nois tumas bai ol i no inap long kisim mani bilong ilektoret bilong ol.

Olsem na sapos i gat vot i no gat bilip i kamap, bai i mas gat gutpela as bilong kamapim dispela vot. Bai i gat inap sapot long ol memba long winim dispela vot o nogat? I kam inap nau, Oposisen i no gat inap



memba long salensim gavman. Bai ol inap long pulim ol arapela pati na ol memba i kam sapotim ol long dispela vot o nogat?

PNG i winim 40 yia nau na ol pipel i laik lukim gutpela senis i

kamap long ilektoret na distrik bilong ol. Na wok bilong ol memba bilong palamen em long sanap wantaim gavman long kamapim ol gutpela lo bilong kantri, na long karim hevi bilong ilektoret i go long pala-

men. Sapos ol memba i gat belpen long praim minista na gavman, orait skelim gut na kisim edvais bilong ol loya pas-taim long ol i mekim wanpela samting. Ol pipel i laik lukim gutpela dibet na toktok i kamap

long palamen, na maski long pulim na taitim long kisim pawa tasol.


Bipo long palamen i bin senisim lo na stopim pasin bilong kamapim vot i no gat bilip i kamap klostu klostu, ol memba i no gat taim long skelim hevi long ilektoret bilong ol na gavman tu i no sindaun gut bikos ol i no save sapos ol bai stap yet olsem gavman o nogat. Dispela kain pasin i kamapim hevi namel long ol memba, ol politikal pati na ol pipel bilong kantri i pilim bikpela pen tru.

Lo bilong stopim dispela kain vot na strongim ol politikal pati em i wanpela gutpela lo. Bikos em i strongim palamen na i strongim demokrasi na i givim sans long gavman i ken kisim win gut na mekim wok bilong ranim kantri.

I mas gat gutpela as tru long putim mosen bilong vot i no gat bilip. Olsem na ol pipel bilong kantri i mas askim husat lain i tingting long muvim dispela mosen long tok klia long wanem as tru ol i laik mekim olsem. Dispela yia 2015 klostu i pinis nau. Na neks yia 2016 bai kantri i redi long narapela nesenel ileksen long 2017 olsem na yumi askim dispela kwesten, kantri i nidim nupela gavman nau o olsem wanem?

Minista Tabar i tok sori long Sir Michael Somare

Esther Bralyn Wani i raitim



MINISTA bilong Haia Edukesen na Risets Sains na Teknologi (HERST), Malakai Tabar.

MINISTA bilong Haia Edukesen na Risets Sains na Teknologi (HERST), Malakai Tabar i tok sori long Sir Michael Somare long toktok we ABC nius i ripot olsem Nesenel Alaiens (NA) Pati i rausim em.

Minista Tabar i tok olsem em i pinisim presentesen bilong em long Crawford Skul bilong Gavanens, Australia Nesenel Yunivesiti (ANU) long Mande Oktoba 12.

Long wankain taim, wanpela ripota bilong ABC i tok long askim em sampela kwesten long presentesen em i mekim na strongpela san long PNG. Em i pilim orait long toktok long presentesen bikos em i save wanem samting long toktok

na long strongpela san i no tumas tasol em i toktok long ol ripot long media.

Em i tok bihain long em i pinis, dispela ripota i askim em long vot bilong no konfidens long PNG oposisen

grup. Em i bekim olsem media i ripot olsem Praim Minista bilong mipela i redi long winim vot bilong no konfidens.

'Em i askim mi gen long wanem hap pati bilong mi (NA) i sanap egensim dispela vot bilong no konfidens. Mi tokim em olsem Oposisen lida i makim Sir Michael long kamap neks praim minista long dispela vot bilong no konfidens,' Minista Tabar i tok.

'Nogat wanpela taim mi tok NA i rausim Sir Michael Somare long Nesenel Alaiens Pati. Mi toktok long wanpela leta Sir Michael i raitim i go long pati, na fainel disisen bilong dispela leta bai kam long Lida na ol eksekutiv bilong pati,' Minista Tabar i tok.

Em i tok em bin tok olsem NA Pati i bin bung tupela

wik i go olsem na stretim toktok olsem bai ol sanap wantaim long luksave olsem ol i bing wantaim long dispela vot bilong no konfidens.

'Mi lukim nius long Mande nait long Australia olsem ABC i no ripotim toktok bilong mi gut,' Minista Tabar i tok.

Minista Tabar i tok, 'Mi gat bikpela rispek long dispela man na nogat wanpela taim bai mi mekim kain toktok we ABC i ripot long Mande, Oktoba 12.'

'Mi laikim ABC long Australia long tok sori long mi na NA Pati long dispela paulim toktok long piksa. Mi laik tok bikpela sori long Sir Michael Somare, famili bilong en, na ol wantok bilong en, NA Pati na Palamen bilong PNG,' Minista Tabar i tok.



Published Weekly, Thursday, for Word Publishing Company, Ltd. P.O. Box 1982, Boroko, NCD Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Websait: www.wantokniuspepa.com

Pe bilong wanpela yia, 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager Elizabeth Konga

Editor Veronica Hatutasi

Published at Able Building Complex, Sec 58 Lot 02, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

Sande bilong tingim wok misin long wol

OLGETA yia long namba tri Sande bilong mun Oktoba, Katolik sios i save tingim Misin Sande. Em i de bilong tingim ol misineri husat i go aut na wok long olgeta kantri long wol na koleksen bilong dispela Sande i save go long strongim wok misin.

Tude, moa long 100 yia bihain long ol misineri i bin karim Gut Nius i kam long Papua Niugini, ol sios insait long kantri

tu i wok long salim ol misineri i go wok long ol arapela kantri long wol. I no ol Katolik tasol, ol arapela sios tu olsem ol Lutheran, Yunaitet Sios, Anglikan na ol arapela tu i gat ol misineri bilong ol i mekim wok bilong autim Gut Nius long ol arapela kantri.

Hia long PNG, i bin gat kain kain selebrensi i kamap long makim Misin Sande. Long St Peter Chanel Erima long NCD,

ol pipel i bin makim dispela spesel Sande long wei bilong ol yet.

St Peter Chanel peris em ol lain Society of the Divine Word Missionaries (SVD) i lukautim. Olsem na long tingim wok bilong ol SVD hia long PNG, ol yangpela i karim ol plak i makim ol kantri we ol SVD misineri long PNG i kam long en. Ol i proseso i go insait long sios na bihain tru, Pater Mar-

ciusus Bei husat i makim Indonesia i kam insait na statim misa. Ol yut bilong peris i bin go pas long liteji long dispela misa.

Oktoba em i mun bilong beten korona na wan wan bilong ol 8-pela Besik Kristen Komyunititi (BCC) bilong peris, i bin bungim ol ofa ol i kisim long tupela wik bilong mun Okotoba na givim i go long sapotim wok misin bilong sios.



Ol yangpela i sanap wantaim ol plak i makim kantri ol misineri i kam long en.



LUKAUTIM GUT PIKININI BILONG YUMI

WANPELA bikpela sip bilong turis i bin kisim bagarap namel long bikpela solwara. Tupela marit i bin harim tok save long PA Sistem na ran hariap i go long ples spit bot i stap long en. Taim tupela i kamap, i gat wanpela spit bot tasol i stap yet na narapela i go pinis. Dispela spit bot i pulap pinis long manmeri. I gat wanpela spes tasol i stap. Man i hariap na kalap i go insait long spit bot lusim meri bilong em i sanap insait long sip i isi sis go daun insait long bikpela solwara. Meri i sanap lukluk long man bilong em, singaut na tokaut strong wanpela samting long man bilong em, taim spit bot i lusim bikpela ship.

Tisa i bin stori dispela stori long klasrum i askim ol sumatin bilong em: "wanem samting meri i singaut na tokaut strong long man bilong em?"

Majoriti sumatin long klasrum i givim bekim olsem: "Mi heitim yu stret." Narapela: "Yu save olsem mi aipas a?" "Yu wanpela gridi man tru." "Nogat sem bilong yu." Na planti narapela bekim moa.

Tasol i gat wanpela sumatin i sindaun isi tasol long bak-sait. Olsem na tisa i kam kamap long en na askim em. Dispela sumatin i bekim olsem: "Tisa, mi bilip strong olsem, meri ya tokaut na singaut strong long man bilong em 'LUKAUTIM GUT PIKININI BILONG YUMI'."

Tisa i kirap nogut na askim em, yu bin harim dispela stori a?

Sumatin i tok: "I no yet. Tasol dispela em i toktok bilong mama bilong mi i go long papa taim em i dai long sik kensa."

Tisa i tanim na lukluk long olgeta sumatin na i tok: "Bekim bilong dispela sumatin i tru stret."

Bikpela sip i sink go daun insait long bikpela solwara, na man ya i bringim bek olgeta pikinini bilong ol.

Sampela yia bihain man i dai. Pikinini i painim diary bilong papa bilong em. Em i ritim insait long diary, stori bilong papa na mama i bin stap long bikpela sip, ol i save pinis olsem meri bilong em i gat sik kensa na em bai dai hariap. Olsem na long taim sip i bagarap, papa i wokim disisen bai em i es-keip long lukautim pikinini. Em i raitim long diary bilong em olsem: "Mi laik indai wantaim yu, meri bilong mi. Tasaol, long lukautim pikinini bilong yumi, mi mas larim yu indai insait long bikpela sip insait long bikpela solwara."

Ol sumatin i sarap tasol na tisa i tokim ol olsem: "Gutpela pasin na pasin nogut bilong dispela graun i kamap, i gat as bilong em. Na sampela taim hat long yumi long andastendim. Olsem na yumi no ken kotim gutpela pasin na pasin nogut bilong narapela, sapos yumi i no save klia yet as bilong em.

Manmeri i save baim/givim mani long narapela, i no mak olsem ol i gat planti samting. Tasol ol i wokim olsem long kamapim gutpela sindaun.

I gat sampela lain manmeri i mekim wok, maski ol narapela i no askim. I no mak olsem ol i stupid, tasol ol i gat rispek long risonabiliiti bilong ol.

Sampela manmeri i save tok sori pastaim bihain long tok kros i no oltaim soim olsem ol i rong. Ol i wokim olsem bikos ol i gat rispek long narapela manmeri.

Ol lain i save givim han long helpim yumi, i no bikos ol i gat dina wantaim yumi, tasol ol i lukim yu olsem pren bilong ol.

Sampela i save kontekim yu, i no mak olsem em i nogat wok. Tasol bikos yu i stap long lewa bilong em.

Sampela lain i save preisim yu planti taim, i no mak olsem yu em i wanpela hiro, tasol bikos ol i laik tok sori long pasin nogut bilong yu.

Ol lain i save tok bilas na kotim yu, i no mak olsem ol i no laikim yu. Tasol ol i laik traim trupela laikim bilong yu.

Misin mun na Misin Sande 2015

KATOLIK Sios long wol i luksave long wok misin olsem wanpela bikpela program insait long sios na em i save putim wanpela de long mun Oktoba olgeta yia long selebretim dispela de.

Olsem long olgeta yia, sios i bin joinim Pop na olgeta Katolik long wol long selebretim mun bilong Misin long las wik Sande, Oktoba 18.

Long dispela mun tu, yumi laik tingim wok misin bilong Sios na misin bilong yumi.

Yumi yet i Sios. Olsem na taim yumi kisim baptismo, yumi kamap memba bilong Sios, yumi i kamap misineri long skel bilong yumi yet.

Lukim daunbilo ol toktok bilong Santu Papa, Pop Francis, long Misin Sande.

Dia ol brata na susa,

Sios em i gat wok misin. Yumi olgeta i gat wok misin. Wok misin em i no wok bilong senisim lotu o bihainim wanpela program. Nogat. Misin em i bun tru bilong bilip na bilong ol i bihainim nek bilong Holi Spirit i tok: Kam na Go. Husat i save bihainim Kraus i mas i stap misineri, bikos ol i save, Jisas i wokabout wantaim ol, em i toktok long ol, kisim win wantaim ol. Ol i pilim Jisas i stap laip wantaim ol namel long wok misin bilong ol. (Evangeliu Gaudium 166).

Misineri tru i save laikim Gutnius moa yet. Sen Paul i tok: "Autim Gutnius em wok Bikpela i givim mi na mi mas mekim. Mi no inap lusim dispela wok. Sapos mi no autim Gutnius, bai mi stap nogut tru" (1 Cor 9:16). Gutnius em i as bilong amamas, stap fri na salvesen bilong olgeta manmeri. Sios i save long dispela bikpela presen, olsem na em i save autim Gutnius olgeta taim long olgeta manmeri "Mipela i save autim tok bilong Tok i gat laip. Dispela Tok i bin i stap bipo, na mipela i harim, na mipela i lukim long ai. Mipela i bin lukluk long en na putim han long en" (1Jon1:1). Misin bilong ol wokmanmeri bilong Tok – ol bisop, ol pris, ol relijes na ol leiti - em i olsem, ol i mas helpim olgeta manmeri long save long Jisas na kamap pren wantaim em. Olgeta bilipmanmeri i mas bihainim promis bilong baptais bilong ol long laip bilong ol. Ol relijes i ken bihainim dispela vokesen moa yet long laip bilong ol, long pre na stap wan wantaim Kraus na stap.

Mi laik blesim olgeta misineri i save autim Gutnius.

Pope Francis



pasin, olsem pasin bilong mari-mari na laik pasin long narapela na bai narapela i lukim na ol tu bai bihainim. Bai yu mekim ol i lain bilong Jisas tu.

Yumi ken beten long ol lain i go pas long autim Gutnius: ol relijes na kain kain misineri.

Yumi ken sapotim wok misin bilong Sios long liklik ofa bilong yumi (ofa i mas i go wantaim pre na sakrifais).

Yumi i ken joinim wanpela misin klap long peris na wok long pre na supotim misineri bilong PNG i autim Gutnius long ol narapela kantri olsem (Zambia, South Sudan, Togo, Ghana, Argentina, Bolivia...)I gat sampela organisesen bilong Sios ol i kolim "Pontifical Mission Societies", Em i save helpim mipela long save moa long wok misin bilong Sios. i gat tripela sosaiti i save sapotim wok misin. Wan wan i gat spesel wok bilong em.

1. The Society of the Propagation of the Faith (Sosaiti bilong autim Gutnius).

2. The Society of St. Peter the Apostle (Sosaiti bilong Aposel Pita) - Em i helpim skulim nupela pris.

3. The Holy Childhood Association (Sosaiti bilong Santu Pikinini) - Em i helpim ol pikinini.

Founder

(Husat i statim) bilong Sosaiti bilong Autim Gutnius, em i wanpela yangpela meri bilong kantri Frans - Pauline Jaricot, (1799 - 1862)



Em i bungim sampela lain manmeri ol i laik helpim wok misin. Olsem na ol i pre na ol i bungim sampela liklik toea na salim i go long helpim wok misin olsem na namba wan wok bilong

long "Propagation of the Faith " em bilong kirapim tingting long wok misin na bilong luksave long nid bilong ol nupela daiosis bilong wol.

Em i askim tu ol pipel long pre long helpim ol misineri na ol pipel ol i wok long helpim. Dispela sosaiti i save askim ol bilipmanmeri long sapotim wok misin long mani.



Founda bilong Sosaiti bilong St. Pita, Aposel, em i narapela meri bilong kantri Frans - Jeanne Bigard (1859 - 1934)Jeanne i harim sampela misineri i krai long help long skulim nupela pater olsem na em i tu stat long pre na wok long bungim sampela mani long helpim skulim nupela pris. Olsem na dispela Sosaiti i save sapotim ol semineri na ol relijes long ol misin daiosis. Ol i askim ol pipel long pre long vokesen na sapotim ol.



Founda bilong Sosaiti bilong Santu Pikinini, em i wanpela bilong kantri Frans - Bisop Charles de Forbin Jansen. (1785 -184) Em harim long pren bilong em olsem planti pikinini i nidim helpim olsem na em i bungim Pauline Jaricot na tupela toktok long wei bilong helpim ol pikinini.

Pauline i tokim ol, askim ol pikinini bilong Frans long helpim ol pikinini bilong narapela kantri. Ol i tu ken pre na bungim liklik "soue" - toea na salim i go helpim ol narapela pikinini.

Olsem na dispela Sosaiti i joinim olgeta pikinini bilong wol long prea. Olgeta pikinini i save stap long skul ol i ken i stap misineri - lainim samting bilong misin na long ol arapela pikinini bilong wol, pre long helpim narapela, serim samting bilong ol wantaim ol pikinini bilong ol misin daiosis.

Ol dispela pikinini i kamap memba bilong "Missionary Childhood" bilong olgeta hap bilong graun. Ol i mekim tu bikpela misin wok. Ol i kamap misineri.

SERIM MARIMAMRI NA LAIK PASIN na long dispela pasin bai yu kamap misineri bilong marimamri bilong God.

OI PNG Pater na Bruder long ovasis wok Misin



WOK MISIN LONG ARGENTINA: Tripela asples PNG pater i mekim wok misineri long Argentina, Saut Amerika. Em long Pater Paul Bina, Vincent Guawi Sem na Pater John Sine.

OL OVASIS misineri bilong Yurop, Amerika, Australia na Nu Silan i bin sanapim sios na pastorel wok, helt na edukesen sevis insait long ol rurel na longweples long PNG.

Misinari sios long PNG i bin helpim long kamapim, kontribut na strongim wok developmen long ol sevis eria olsem helt, edukesen na integrel humen developmen long dispela kantri.

Long las wik Sande Oktob 18, Katolik Sios long wol i bin selebretim Wol Misin Sande. Nau, moa long 100 yia bilong Katolik sios long PNG,

sios long dispela kantri i go strong na nau, em i wok long salim ol PNG asples pater, bruder na sister i go long ol ovasis wok misin olsem ol misinari long Afrika, Saut na Not Amerika, Karibien, Yurop na Filipins.


Divain Wod Misineri (SVD) em i wanpela intanesenel kongrikisen i stap tu long PNG.

Kongrikisen long PNG i wok long gro we i lukim mak bilong ol lain long seminari skul long Katolik Tiolojikel Institut long Bomana, ausait long Mosbi siti na ol arapela liklik han seminari long kantri

i kisim moa yangpela man long ol skul bilong ol.

Wankain tu long ol Sister na Bruder. Ol Konven bilong ol Sps o Holi Spirit Sister, em han bilong SVD Kongrikisen, i wok long lukim moa yangpela PNG meri i joinim kongrikisen na tu, ol i salim sampela bilong ol i go long ol wok misin ovasis log Afrika, Yurop na Amerika.

Wol Misin Sande i bin kamap long las wik Sande, Oktoba 18, i bin taim bilong luksave na selebretim ol wok we ol misineri i mekim bipo, tude na long bihain taim.



YUT PROGRAM: Pater Paul Bina long Argentina i karimaut wanpela program wantaim ol yut.

Wok Misin long Amerika na Afrika:
Nainpela (9) we 8-pela em ol pater na wanpela Bruder SVD bilong PNG yet nau i wok misineri long Not na Saut Amerika na Afrika i stap. Em long:

- Pater Francis Koimb Prescott bilong Am-bullua, Mt. Hagen, i wok long Ghana;
- Pater Alex, Garuai S. bilong Tunuru, Bogenvil i wok long Zimbabwe,;
- Pater Gabriel Kokon bilong Mawak Village, Madang, i wok long Madagascar;
- Pater Rex Simangi bilong Mambe, Wewak, i wok long Brazil;
- Pater Dennis Nyiaura T. bilong Mambe, Wewak, i wok long Bolivia;
- Bruder Aloysious Aisi bilong Yule Ailan long Bereina i wok long Amerika;
- Pater Cosmas Kombla bilong Yawaremol, Mt. Hagen, i wok long Paraguay;
- Pater Paul Bina bilong Gembogi, Goroka, i wok long Argentina
- Pater Vincent Guawi bilong Maprik, Wewak, i wok long Argentina,

Kam bek long PNG bihain long wok misin:
Pater Martin Goi-Mangi bilong Minj, Mt. Hagen, i kam bek long Ghana;
Pater Elias Aiyako bilong Paiela, Wabag, i kam bek long Caribbean,
Pater Norbert Koima bilong Gembogi, Kundiawa, i kam bek long Philippines,

Stap long Ovasis Trening Program:
John Sine bilong Smbu, Kundiawa, i stap long trening skul long Argentina

Redi long go long ovasis Misin:
Pater Clement Daimas bilong Bogia, Madang, bai go long Brazil,
Pater Vincent Wasaring bilong Manggai, Kavieng bai go long Caribbean

Redi long go long stadi:
Jeremiah Kaumbal bilong Roma, Wewak, bai go long Germany,
Mark Gende, Okuk bilong Simbu, Kundiawa, long Poland.

PNG i redi long 2016 Pasifik Arts Festival long Guam

PAPUA Niugini i redi long long mas i go long hap bilong soim ol kain kain bilas bilong ol long Agatna, Guam long soim ol stail arts na kalsa bilong ol long neks yia.

Festival bilong Pasifik Arts long namba 12 taim ol i oge-naisim na redi long karim aut long wanem gavman na ol pipel bilong Guam i wetim gutpela so.

Dispela festival bilong Pasifik Arts i save kamap bihain long olgeta 4 yia taim em i stat long 1972. Em i save bungim ol atis na ol pipel i save soim ol kalsa bilong ol long olgeta hap bilong Pasifik rijon long tupela wik.

Ol i save luksave long en olsem bikipela kalsarel iven, na bikipela bung we ol pipel long Pasifik i save bung long strongim pasin bilong rispek.

Ol i bin kisim dispela tingting long Festival bilong Pasifik Arts long Konprens bilong Saut Pasifik Komisn (nau em Sekreteriet bilong Pasifik Komyuniti - SPC) long abrusim pinis bilong ol pasin kastom.

Long 1972, ol delegesen long 27 Pasifik Ailan kantri na Teritori i bung wantaim long skelim na senisim ol kalsa long wan wan Festival bilong Pasifik Arts. Wanpela delegesen bilong 2, 500 husat bai soim ol kalsa bi-

long ol, ol atis na ol pipel bilong praktisim kalsa bai i go, olsem tausen moa visita long Esia na ol pipel i save bihainim dispela festival bihain long olgeta 4-pela yia.

Ol 27 Pasifik Ailan kantri na ol Teritori bai stap insait long dispela festival em Amerikan Samoa, Australia, Cook Ailan, Ista Ailan, Federet Stet bilong Maikronesia (FSM), Fiji, Frens Polinesia, Guam (hos bilong 2016), Hawaii, Kiribati, Masel Ailan, Nauru, Nu Kaledonia, Nu Silan, Niue, Nofok Ailan, Noten Mariana Ailan, Palau, Papua Niugini, Pitken Ailan, Samoa, Solomon Ailan, Tokelau, Tonga, Tuvalu, Vanuatu, na Walis na Futuna.

Guam i baim dispela festival long holim dispela namba 12 Festival bilong Pasifik Atrts na i winim dispela luksave long namba 10 Festival i bin kamap long Amerikan Samoa long 2008.

Em i bin long namba 11 Festival bilong Pasifik Arts i kamap long Solomon Ailan long Julai 2012, we Guam i bin kisim festival flek.

Dispela 2016 festival em i sans bilong Guam long soim ol stail Chamorro kalsa bilong ol i bin stap yet long taim bilong kolonaisesen na modenaisesen long nau.

Namba 12 Festival bilong

Pasifik Arts bai kamap long Maikronesia Stet bilong Guam long Me 22 inap Jun 4 long 2016. Em bai kamap long tupela wik.

Long wankain taim, olsem 170 pipel long Papua Niugini bai stap insait long dispela festival long Litreri Arts olsem mekim stori tumbuna, ol pablikesen, histori, tiata, bilas na tokples.

Ol bai stap insait long Demonstresen/Eksibisen olsem visuel arts, arts bilong flawa, arts bilong kuk, kanu na nevigesen, arts so bilong ol pikinini, poto, mekim tatu, pinisim sik na sua long bus marasin, bilas bilong bodi, kaving, blek smit, mekim ol samting long han, piksa festival, tradisenel gem, wokabaut long paia, mekim basket, musik, painim pis na painim enimal long bus, ol Forum, ol woksop na ol semina.

Olsem hap bilong dispela tim long redi long Festival bilong Pasifik Arts, Nesenel Kalsarel Komisn (NCC) i go pas long PNG Ogenaisng Komiti long opim dispela festival wantaim wanpela dina long Dynasty Restoran long Vision City Mega Mal.

Dispela dina bai kamap long Novemba 13 na tiket bilong wanpela man em K500 na wanpela kopret sponsa em K5, 000 long wanpela tebol.



Ol kain kain stail bilas bilong Papua Niugini long namba 10 Pasifik Arts Festival long Amerikan Samoa long 2010.



Bai yu ai gris na maus wara

Nicky Bernard i raitim

PLANTI bilong yumi i save long kukim kaikai na bai yumi kukim kaikai long kain kain stail yumi laikim long kaikai.

Planti bilong ol yangpela manmeri nau i wok long go long skul bilong kukim kaikai na taim ol i pinisim skul, ol i save go long ol hotel o restoron na wok olsem kuk manmeri.

Wanpela yangpela man i bin go lainim long wei bilong kukim kaikai, na taim em pinisim skul, em i painim wok long Lamana Hotel olsem kuk man.

Dispela stail mangi em Jemmy Victor. Em i save long wei bilong kuk stret, na taim ol lain bilong em long hotel i askim em long kuk autsait, planti manmeri save opim ai long wei em save kuk.

Ol pablik manmeri tu i save maus wara wara long

smel bilong kaikai em i save kukim, na ol i no save westim taim long baim ol kaikai.

Jemmy i save gat stail. Taim em i kukim nudels na miksim wantaim kakaruk, em bai putim sampela liklik samting olsem lombo, kep-sikum, liklik raun kabis na sampela liklik samting moa long mekim nudels bai smel gut tru.

Taim ol manmeri i lukluk long em bai em mekim liklik stail bilong ol kuk manmeri long plaim ol kaikai go antap na bihain ketsim long praipan.

Jemmy tu i save long hamas paia i mas lait long kukim ol dispela kaikai. Planti manmeri long Fonde nait i save raun go long Lamana Hotel long lukim Jemmy wantaim ol wanwok bilong em kukim kaikai na taim maus bilong ol wara, ol save go na baim kaikai.

Stori bilong tumbuna

Man bilong Kaikai abus

Bipo wanpela man i stap na em man bilong kaikai abus. Olsem na olgeta taim, em i go raun long bus long sekim rot bilong ol kapul. Wanpela taim, em i raun gen na lukim wel mango i go mau na wanpela welmeri i kam kaikai i stap, na em i ting ol kapul na long apinun i go was. Tudak pinis na wanpela welmeri i karim bebi na wokabaut i kam. Man i pret na go hait. Meri i kam na hangamapim bebi long han bilong diwai go antap na kaikai i stap.

Man i ran i kam karim bebi wantaim bilum na go long ples na soim bebi long ol famili na ol i pret nogut papa na mama kam bagarapim ol.

Stret mama i kam singaut, "Givim mi. Nawenawe hariap, nogat bai mi pinisim yupela olgeta."

Ol i pret na bungim tumbuna na ol i pasim pik, givim em na lusim ol i go bek.

Pikinini i kamap bikpela pinis. Long san em i save slip, na long nait em i save wok tingting na save bilong en i winim save bilong man. Olsem na ol i jeles na posinim em i dai.


Long sampela hap bilong Raikos dispela pasin i stap yet. Nem bilong pikinini we mama i kolim em Nawenawe na ol man kolim em Gisa. Nau dispela nem i go yet.

Maningne Wedong
Yokea Ples, Raikos District
Madang,

TOKSAVE:

WANTOK i askim ol gutpela rida bilong em long salim ol tumbuna stori i kam na bai mipela i putim long niuspepa. Sapos stori bilong yu i gutpela na mipela i putim long niuspepa, bai yu winim **K50** we mipela bai salim i go long akaun bilong yu, o salim mobail yunit inap long **K50** i kam long fon bilong yu. Salim nem, edres na mobail namba bilong yu wantaim stori i kam long dispela edres: *Stori Tumbuna, Wantok Niuspepa, C/Word Publishing Company, P O Box 1982, BOROKO, NCD, PNG o email edres: editorial@wantok.com.pg Telepon namba: 3252500.*

Tenkyu



Jemmy Victor i mekim stail kuk bilong em long Lamana Gold Club na long baksait, Donald Fabila em sekyuriti supavaisa. Poto Nicky Bernard.

Yangpela moran snek pundaun long diwai go daun

James G. Kila i raitim




LONGPELA TAIM bilong san na nogat ren i pundaun long planti hap bilong kantri tu i wokim ol samting bilong bus olsem ol snek, rat na ol wail pik long bus i painim ples kol na wok long raun i go aut ples-klia nau.

Long Mande apinun wanpela yangpela moran snek we i save stap antap long marmar diwai i popaia stret taim em i laik holim wanpela blakpela kotkot pisin na pundaun i go daun long graun. Sneka ya em yangpela na skin bilong em sain nais tru. Tarangu snek ya i pundaun i go daun long graun na mas bagarapim sampela hap long bodi bilong en na ol wokman bilong Raibus Engineering i traim long helpim em, tasol em skin dai na slek tru olsem na ol pinisim laip bilong en na givim long sampela lain husat i save kaikai sinek.

Ol wokman bilong Raibus Engineering graun-kru long Madang Bes blong Ramu NiCo (MCC) i sanap lukim yangpela moran sinek em pundaun long diwai i go daun. Poto: James G. Kila



Em nau! Ol pikinini i ken painim rot i go long ples wantaim Wantok kru...



Ol wod lista hia:

- ASPIRIN
- AUTAIT
- BIKMAUS
- BRUS
- DEMDEM
- DRAM
- ENSEL
- FRIMERI
- GUDE
- HAPASDE
- HINSIS
- KAPIAK
- KLIRIM
- KLIAIM
- LESON
- LUKAUTIM
- MASIS
- MONINGTAIM
- NARAWE
- OPTIN
- PARABEL
- PARAM
- PRETMAN
- PURPUR
- ROTANG

R T H R L Z T V E E R J N W W S I W E S
 A O S V L E R N H M S X H L S E O W V N
 R C T K D E M I U K L P R E P A G R G W
 D T O U W F S C E P L G X H O E C E O Y
 A S W O T O R O T A N G V I U G P T T A
 P H S S P A P I N E E S N V N R C S G N
 J X M P A U A T D J D A K N N S L N F H
 G E E L M T R S I N D E G F S R M P H G
 C G L W U N A P I N N O E A I X D R G T
 E F H A C P B A U L C B F A M C R H U B
 X M H O A R E G M R A T A T R S A P D E
 E X K H P E L E I A P F F R Q J M G E I
 M J I L L T D Z S S S R D F L M P W P I
 K L I R I M K I U U O I O U U M A T Y T
 L R N D E A S N R W I M S E K R R U J G
 O A O D I N I B R N O E N D A J A S H Y
 S N T P I R O M M S E R B N U S M L W O
 O G A H Q W Y D M O N I N G T A I M L X
 R K N R T E N S E L L A S P I R I N J N
 W P E T Z A O E N V W B I K M A U S I T



Buddy Kanage em bos stret bilong skul geit!

BUDDY Kanage em i wanpela strit mangi long Apo kantri. Edukesen i abrusim em pinis. Em i man bilong raun long strit na salim buai na smok. Liklik wansling em i kisim em i save tromoi long 6 peks long Bintangor Trading long Goroka. Long wanem em wanpela ful sapota bilong ol mangi Apo stret, Goroka!

Em i no gat famili. Ol wokman i save wetim pot-nait, tasol Buddy Kanage em no gat. Em i save on long seven de insait long wanpela wik. Yu ting wanem? Kanage, em fit mangi stret, the buai seller.

Wanpela taim em i dring na spak nogut tru na em i kam sanap poromanim skul geit, em buai maket long Goroka.

Ol meit bilong em, ol i strit mangi i lukim em na wokim pani long em. Tasol Buddy Kanage em i bikpela mangi na olgeta manmeri i save long em. Na em i no wari, em tu i wokim ekstra pani antap gen. Ayo! Maski, bikpela pani na bikpela nois tru i kamap. Olgeta manmeri i save em Buddy Kanage tasol!

Na i wok long pris long ol manmeri. Kain olsem wanpela edukesenis bilong strit.

Tasol, maski wanpela poro bilong em i salensim em liklik na em i no wanbel. Em bikpela mangi ya! Na em i tromoi hap Inglis long meit bilong em olsem. "Yu wanna salens mei. No! no! no! I do not like dizz. Respect 35 and make 34." Man ol manmeri kirap nogut tru olsem Buddy Kanage i save long Inglis tu ya! No ken traim Buddy Kanage, Inglis kilim em na stap!

Mams Kanag, em gel stret

MAMS Kanage em on pinis wantaim Live Lavex na gel em i kam sanap wantaim SP wan botol na salim ero bilong dat, em 10t tasol long wanpela spia long Suave maket.


Na em i singaut i stap long ol man i kam baim spia na sutim dat long winim wanpela Maggie kiub.

Tasol, nogat man i kam. Ol i save olsem mams em mas on pinis ya.

Olsem na wanpela liklik mangi bilong hauslain i kam long trikim em. Em i kam na kisim 10-pela ero long han bilong mams Kanage. Na em i sut i go na ero em i pinis na em i laik go. Na Mams Kanage i askim em long mani bilong baim ol spia. "Eei boi, mani i kam, yu no baim ero yet".

Mangi ya, em i ting olsem Mams Kanage em i aut pinis na em i no nap save. Na em i laik trikim mams, tasol mams i save yet. Na boi ya i tokim Mams olsem, "Mams, mi traim han tasol ya". Na mams i Inglis long em. "Eei boi, wai and you trick me?" Mams Kanage em gel stret, no ken traim em. Bai yu kisim Inglis ya!

Ansa bilong Wod Pilai isu 2144





TOK PISIN NEWS

from Radio Australia
radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service
6am - 7am 6080; 7240(KHZ)
7pm - 9pm 5995; 6020; 9710; 1280(KHZ)

Disisen long Vanuatu Konstitusen keis Fonde



SUPRIM Kot bilong Vanuatu bai givim disisen bilong en long Fonde long tupela konstitusinel keis we em i bin harim long tude.

Wanpela em long salens bilong Oposisen Memba Joe Natuman egensim wei Spika husat i bin Acting President, Marcellino Pipite i givim marimari long em yet na 13 arapela memba, 10 pela de i go pinis.

Presiden Baldwin Lonsdale i bin rausim pinis dispela marimari long las wik Fraide.

Tasol long asde tu, gavman bilong Praim Minista Sato Kilman i salensim wei Presiden Lonsdale i bin rausim dispela marimari. Kot bai givim disisen bi-

long en long 3 klok tumora apinun.

Long wankain taim, pisful protes we Vanuatu Women Against Crime And Corruption i bin laik wokim long Port Vila asde i no bin kamap long wanem, ol polis i bisi tumas long konstitusinel kraisais.

SiAmeri bilong anti-korapsen grup, Jenny Ligo i tok ol i bin kisim polis pemit pinis long wokim protes - tasol ol i stil nidim polis sekyuriti long taim bilong protes.

Ms Ligo i tok bai ol i makim narapela taim long protes long wik bihain.

Ol i laik holim protes long autim tingting bilong ol long konstitusinel kraisais i kamap long Vanuatu nau.

Klostu taim bilong saiklon long Vanuatu



Long dispela taim we sampela hap bilong Vanuatu i kisim hevi long wanem i no bin gat ren longpela taim tru, Klaimet Divisen bilong Vanuatu i tok klostu nau Vanuatu bai stat long lukim sampela saiklon.

Vanuatu bai nap lukim sikispela saiklon long saiklon sisen we klostu nau bai stat Ripot i kam long ABC Nius i tok Manesa bilong Climate Division bilong Vanuatu Meteorology na Geo-Hazards Department, Philip Malsale i tok samting olsem 2-pela i go inap long sikispela saiklon bai kamap long 2015 - 2016 saiklon sisen.

Dispela sisen em namel long mun Novemba i go inap long Epril 2015.

Long dispela taim tu ol Met sevis long Pasifik i lukim olsem namel long 11 na 13 saiklon nau bai kamap long rijon.

Mista Malsale i tok long Vanuatu, wanpela o moa long ol saiklon we bai kamap long kantri em strong bilong ol bai moa long kategori 3.

Em i tok long dispela taim ol pipel i mas bihainim gut toktok bilong ol atoriti olsem ol lain bilong weather opis, na tu ol lain long gavman na nesenel disasta manesmen opis.

Ati George Sokomanu autim tingting long mosen

ATI George Sokomanu, presiden bilong Vanuatu bipo i tok Republik i nid long senisim mama lo bilong en long stopim ol politisen i save mekim vot bilong no-konfidens olgeta taim.

Ati George Sokomanu i mekim dispela toktok bihain long ol bikpela hevi bilong wok politik i kamap long kantri.

Em i bin autim dispela toktok bihain long polis i bin kalabusim 11-pela memba bilong palamen long Fraide 9

long Oktoba.

Suprim Kot i bin painim ol dispela Palaman memba wantaim Deputi Praim Minista Moana Carcasses Kalosil na Eking Presiden Marcellino Pipite husat i bin givim marimari long ol dispela memba em suprim kot i bin painim ol i gilti long korapsen.

Mista Sokomanu i tok tu olsem em bai gut tu long kantri i holim referendam o vot long senisim mama lo bilong kantri.

No ken larim ol PNG risev polis i karim gan



WANPELA NGO lain i tok ol risev polis long Papua Niugini i no ken holim gan long wanem ol i no gat gutpela nem long komyniti long polis brutaliti. ABC Nius I ripot long dispela samting.

Esther Igo wanpela senia memba bilong "Women Arise PNG" em ol i save toktok long daunim vailens long kantri, i mekim dispela toktok bihain long Polis Komisina i bin tokaut long wik i go pinis olsem bai ol i larim ol risev polis long

karim gan taim ol i wok.

Polis Komisina Gari Baki i bin tok olsem bai ol i skulim gut ol dispela risev polis long karim ol polis gan na em yet bai oraitim dispela wok sapos ol i kisim gutpela trening.

Dispela tingting bilong Komisina Baki i kamapim pinis planti toktok na wari long kantri long wanem, ol i bin sutim tok long sampela risev polis long sutim dai tupela pipel long Hanuabada long stat bilong dispela yia.

Ol 11 Vanuatu memba aut long beil



KOT bilong tude i larim ol 11-pela Vanuatu MP i kam autsait long kalabus na tripela loya we polis i bin arestim na putim long kalabus long las wik Fraide long sas bilong konspirasi long paulim jastis sistim.

Dispela i kamap bihain long Spika na Ecting Presiden, Marcellino Pipite i bin givim marimari long em yet wantaim 13 arapela memba Suprim Kot i bin painim ol i brukim lo long ol korapsan

sas.

Presiden bilong Vanuatu, Baldwin Lonsdale i bin rausim pinis dispela padon bilong Mista Pipite.

Pastaim long ol i arestim em long Fraide, Mista Pipite i bin rausim tu wanpela notis bilong oposisen long muvim mosen bilong nogat bilip long praim minista.

Spika Pipite i tok wanpela memba long list em i senisim tingting na rausim nem bilong en.

Solomon Ailan i wari long ol hevi bilong reip



WANPELA NGO lain i singaut long gavman wantaim ol sios na pipel long Solomon Ailan i mas wok bung wantaim long stopim pasin bilong reipim ol bikpela meri na ol yangpela pikinini meri.

Josephine Teakeni, dairekta bilong Vois bilong Mere i mekim dispela toktok bihain long indai bilong wanpela pikinini meri em wanpela man i bin kilim long Malaita Provsins. Solomon Star niuspepa i

bin tokaut long dispela stori olsem wanpela man i bin traim long reipim dispela yangpela pikinini na taim pikinini i tok nogat, dispela man i bin katim em long akis.

Solomon Ailan, wankain olsem ol narapela kantri long wol i gat wari long jenda beis vailens.

Ms Teakeni i tok nesenel gavman, ol komyniti lida na ol sios i mas painim gutpela rot long daunin dispela hevi long kantri.

Trudeau i kamap nupela praim minista bilong Canada



BIKPELA SAPOT LONG WIN: Justin Trudeau wantaim ol sapota na Liberel Pati memba selebretim win bilong em.



AMAMAS: Planti pipel long Canada i soim bikipela amamas long Justin Trudeau i winim sia bilong praim minista. Ol Poto: ABC

KANTRI Canada i gat nupela praim minista. Yangpela Justin Trudeau i gat 43 krismas na em i pikinini bilong olupela na biknem we pipel i laikim praim minista bilong Canada, Pierre Trudeau, i bin winim Stephen Harper husat i bin presiden bilong Canada insait long las 9-pela yia long kamap namba 23 praim minista bilong Canada. Papa bilong em Pierre i bin

praim minista bilong Canada long 1968 i go long 1979 ana gen, long 1980 i go long 1984. Justin Trudeau na Liberal Pati bilong em i bin win long bikipela mak wantaim 184 sia long 338 Palamen sia long fomim mejoriti gavman. Mista Trudeau i tok em bai skamapim gut wok pren bilong Canada wantaim edministresen bilong presiden Barack Obama bilong Ame-

rika, rausim ol ami bilong Canada i pait egensim Islamik Stet teroris na givim marimari helpim tasol na sapatim ol wok bilong klaimet senis, ranim ol liklik defisit baset na tromoim moa mani long infrastraksa long stron-gim gro bilong ikonomi, apim takis bilong ol lain i kisim bikipela mani na daunim takis long ol midel klas lain.

Polis long Australia painim tupela birua papa na pikinini



Polis i painim dispela tupela papa na pikinini, Gino na Mark Stocco, tupela birua man stret. Poto: ABC

POLIS i askim pablik long Victoria, Australia long was gut long tupela papa na pikinini husat i karim ol gan samting na birua man. Nem bilong ol em papa Gino Stocco i gat 58 krismas na pikinini, Mark i gat 35 krismas. Ol polis i sanapim rotblok long Victoria taim ol i painim tupela papa na pikinini bilong Kwinslen husat i ronawe long abrusim lo

RASIA na Amerika i sainim agrimen long ea sefti



RASIA PAITA BALUS: Balus bilong Rasia i karimaut ea straik long Syria. Poto: ABC

AMERIKA na Rasia i sainim sefti long ea agrimen taim ol i karimaut ol wan wan kempen long bomim Syria, Pentagon i tok. Dispela i kamap bihain long ol ripot olsem ea straik bilong Rasia i kilim moa long 145 pipel long Syria, tripela wik taim ol i bin statim kempen bilong ol long Syria. Nau gen, ol ripot i tok samting olsem 45 pipel long not bilong Syria i dai bihain

long ea straik bilong Rasia. Pres Seketeri bilong Pentagon, Peter Cook, i tok agrimen ya ol i bin sainim long dispela wik Tunde bai lukautim ol pilot bilong tupela kantri long stap klia long wanpela narapela taim ol i stap karimaut wok bilong ol long ea. Amerika i go pas long 60 plas memba koalisen i tagetim ol IS jihadis long Iran na Syria na i karimaut operesen moa long wanpela yia nau.

Rasia i tok em tu i tagetim ol IS na ol narapela teroris, tasol Pentagon i tok em (Rasia) i wok long bomim ol eria i no bilong ol IS paitman, tasol ol narapela paitman i wok long pait egensim presiden bilong Syria, Bashar-al-Assad. NATO i wari long Rasia i go insait long dispela paitman long ea bilong Syria bihain long ol ripot olsem balus bilong Rasia i kilim 15 moa pipel long Syria.

No laikim Prins Charles long kamap het bilong Stet



NO LAIKIM: Wanpela pastaim Praim Minista bilong Australia, Paul Keating na Prins Charles. Mista Keating i pret long Prins Charles i kamap het bilong Stet long Australia. Poto: AB

PASTAIM Praim Minista bilong Australia, Paul Keating, i askim strong nau Praim Minista, Malcolm Turnbull long sevim Australia long noken larim Prins Charles i kamap hetman bilong stet. Em i tok tingting long dispela samting i kamap i mekim em i sik. Mista Keating i laikim Aus-

tralia i kamap wanpela ripablik na em yet bai gat het bilong stet, na i no king o kwin bilong narapela kantri. Mista Keating i tok em i wok bilong praim minista long mekim samting long dispela. "Yu ken gat ol ripabliken muvmen yu laik, tasol sapos praim minista i no strongim na mekim samting, bai i no

inap kamap," Mista Keating i tok. Em i tok tingting long Prins Charles i kamap het bilong Stet taim Kwin Elizabeth i go pinis i no gutpela. "Bai wanem samting i kamap? "Charles na Camilla?" mi no wanbel stret?" Mista Keating i tok.

bikos ol i painim ol long sutim dai wanpela polisman long Nu Sdaut Wels las wik. Polis i ripot olsem tupela em sampela long ol birua man stret long Australia. Ol i painim ol long ol bikipela birua ol i wokim long sampela stet long Australia, long sait bilong propeti na sutim dai wanpela polisman long Nu Saut Wels las wik.

Infomol sekta bai kisim luksave

PNG bai gat nupela lo long givim luksave long infomol sekta na infomol ikonomi. Infomol sekta em i wanpela eria we em i karamapim ol liklik bisnis ol manmeri PNG i save mekim long sapotim laip bilong ol yet.

Lo bilong sapotim ol lokol manmeri i mekim ol liklik bisnis i bin stap long kantri tasol planti taim gavman na ol manmeri yet i no save luksave long dispela lo.

Dispela lo em i Infomol Sekta Developmen na Kontrol Act 2004. Konstitusene na Lo Rifom Komisin (CLRC) aninit long tok orait bilong gavman i bin kamapim sampela nupela senis long dispela lo.

Ol wok manmeri na loya bilong CLRC i bin raun long olgeta hap bilong kantri long kisim tingting long ol maneri long kamapim dispela senis long lo bilong infomol sekta.

Long Mande, ol i lonsim dispela ripot long Yunivesiti ov Papua Niugini (UPNG). Bihain long dispela lonsing, dispela ripot bai go long Palamen na ol bai kamapim olsem wanpela nupela lo.

Komisina bilong CLRC na Eksekutiv Din bilong UPNG Lo Skul Dokta Mange Matui i tok dispela lo bai nau givim luk-

save long ol liklik manmeri long PNG long kirapim liklik bisnis.

"Infomol sekta em i samting olsem wanpela mama i salim pinat na ais blok arere long rot. Dispela kain liklik bisnis em i kam aninit long infomol sekta," Dokta Matui i tok.

Em i tok ol polisman i save paitim ol dispela kain mama husat i save salim dispela kain liklik samting arere long rot.

"Dispela i minim olsem lo bilong polisman tu bai senis long larim ol polisman i noken paitim ol manmeri i mekim dispela kain liklik bisnis," Dokta Matui i tok.

Em i tok sampela taim ol mangi long strit long Mosbi siti i save salim naif na petrol o kerosin long pablik ples, we dispela tripela samtin i ken kamapim birua long laip bilong manmeri.

"Ol dispela samting i kisim luksave long dispela nupela lo. CLRC Dispela nupela lo bai larim ol manmeri i daunim ol nogut samting i save kamap long infomol sekta na bai larim ol gutpela samting i kamap long kirapim ol nupela bisnis," Dokta Matui i tok.

Long PNG, planti ol liklik bisnis we lo i tok orait long ol manmeri PNG yet long

mekim i nau go stap long han bilong ol Esian manmeri.

Liklik bisnis olsem haus kai o salim ol stoa samting em ol bisnis we manmeri PNG yet inap long mekim.

Tasol ol Siana, Meleisia na Korea manmeri i kisim pinis. Ol manmeri PNG yet i save mekim liklik bisnis arere long rot na long strit.

Wanpela strit sela long Waigani Maket long Pot Mosbi i tok dispela nupela infomol sekta lo bai larim ol liklik manmeri i kirapim bisnis na helpim ol long senisim laipstail na sindaun bilong ol.

"Mi amamas long dispela nupela lo. Tasol ol Saina i wok long kisim olgeta liklik bisnis long kantri na mipela manmeri PNG i wok long kaikai das, ron wantaim polis na mekim bisnis long traipela san," John Lakaio i tok.

Lakaio i save salim buai, smuk, kol wara, skon, na ol loli long Waigani maket. Em i save mekim moa mani long buai tasol nau NCD i tambuim buai long siti na em i no moa salim buai.

Em i tok dispela lo i mas stopim ol polisman long paitim ol manmeri natin taim ol i salim ol samtin arere long rot.

Ramu NiCo sanap strong long lukautim ol wokman

WOL METOL na oil prais i pundaun stret long dispela yia we i lukim planti ol bikpela intanesenel kampani long wok bilong maining na oil na petroleum industri i pasim wok bilong ol na tokim ol wokman meri bilong ol long go malolo.

PNG tu i lukim ol bikpela maining kampani i bungim bikpela hevi long sait bilong fainens mani long sapotim na strongim wok operesen bilong ol.

Sampela ol maining kampani i tokim ol wokman bilong ol long go malolo na tu sam-

pela i salim sea bilong ol i go long ol arapela intanesenel kampani bikos ol i no inap long sanap strong ol yet.

Ramu NiCo Menesmen (MCC) tu i bungim bikpela salens tru long sait long fainens bilong en. Tasol em i laki long ol marimari bilong mama kampani bilong en long Saina em MCC Grup (Metalurgical Grup Kperesen bilong Saina) we i givim dinau long Ramu NiCo.

Presiden bilong Ramu NiCo (MCC), Wang Jicheng i no long taim i go pinis i givim strongpela toktok i go

long ol menesmen na wokman meri bilong Ramu NiCo long ol Madang long wok moa long sait long sevim kos.

Mista Wang i tok Ramu NiCo tu i go insait long wankain salens em ol arapela bikpela maining kampani long wol we i bungim. Tasol em i luksave long planti hatwok, tuhat na pen ol wokman bilong en i givim stat long konstraksen i kam prodaksen na i laik sanap strong na wokaboutkabaut wantaim ol long dispela taim bilong bikpela salens.

Presiden Wang nau i askim olgeta Ramu NiCo wokman meri olsem ol mas wok wantaim gutpela tingting na lukluk moa long sait long sevim kos long helpim kampani insait long dispela nogut we prais bilong metal long wol maket em daunbilo tru.

Long PNG i gat planti ripot i kamaut pinis we ol bikpela maining kampani i salim ol wokman bilong ol i go malolo na wet inap metal prais i go antap na ol bai go bek. Tasol Ramu NiCo (MCC) tasol i wari na tingim ol wokman bilong em holim ol yet.

Papagraun i no long wanbel long Asidokona

PETROMIN PNG Holings i bin sainim wanpela agrimen las wik long salim Tolukuma gol main i go long wanpela kampani bilong Singapo ol i kolim Asidokona Maining Risoos PTE .

Tolukuma gol main i stap long Goilala distrik insait long Sentral Provins na Petromin i bin lukautim dispela gol main tasol bihain long nius i kamaut ples klia olsem Petromin bai salim dispela main, wanpela biknem papagraun i tok ol pipel i no wanbel long dispela nupela kampani i tekova long main.

Siaman bilong Auga-Dilava Risos Asosiesen Billy Aia i tok ol papagraun i no wanbel long dispela nupela kampani bikos Petromin i bin no bin toksave gut long ol lenona na papagraun olsem Asidokona bai kam insait na tekova long maining operesens long Tolukuma.

Auga-Dilava Risos Asosiesen i makim maus bilong ol papagraun bilong Tolukuma husat i ol Goilala, Kuni na Mekeo manmeri.

Mista Aia i tok Asidokona Maining Risoses PTE Limited, i laik baim dispela namel sais gol main bihain long Petromin na Asidokona i sanim wanpela agrimen ol i kolim Sel Se Agrimen bipo las wik Trinde tasol long dispela agrimen tupela i no tokaut ples klia long olsem wanmem tupela kampani bai stretim ol papagraun wantaim sampela ol envaironmetal isus. "Mipela i ridim long niupepa olsem Asidokona bai putim K40 milien long kirapim na ronim gen Tolukuma gol main. Tasol ol i no tokim mipela papagraun na pipel bilong PNG long olsem wanem ol bai stretim ol bagarap dispela maining i bin mekim long bus, graun na wara bilong mipela," Mista Aia i tok.

Mista Aia i tok Asidokona i nogat wanpela eksiprens long ranim maining operesens bikos em i painiaut olsem ol i bin rejistaim dispela kampani insait long 3-pela mun tasol.

Las wik, Petromin menesing dairekta Thomas Abe i tok Petromin i bin tingting long salim dispela gol main long taim yet tasol nogat wanpela baia i bin tingting long baim.

"Mi amamas long Asidokona i wanbel long baim Tolukuma. Asidokona i gat mani na gutpela tingting long kirapim dispela maining na larim ol manmeri PNG yet i wok na ranim Tolukuma," Mista Abe i tok.

Pablik konsaltesen long wok patnasip bilong EU wantaim ACP

OL bikpela mausman bilong Foren Afes na Yuropien Komisin i tok aut long wanpela pablik konsaltesen namel long EU na ACP we bai lukluk long developmen i go bihain long yia 2020.

EU Hai Representativ bilong Foren Afes na Sekyuriti Polisi, Federica Mogherini na Yuropien Komisin i makim EU long tok long dispela pablik konsaltesen namel long EU na ACP go long 2020 na bihain moa, taim EU-ACP Cotonou Agrimen bai pinis.

Cotonou Agrimen em i wanpela klia patnasip agrimen we EU i lukautim wok poroman namel long EU na 78 liklik kantri long Afrika, Karibien na Pasifik.

Em i karamapim wanpela eria bilong politik, ikonomik wok bung na tred, na tu wok bung wantaim long developmen we bai bungim i go long wanpela rot bilong fainens ol i kolim Yuropien Developmen Fan (EDF).

Ol i kisim tingting bilong ol kain kain stekhola na ol narapela husat i gat laik long wok bung wantaim em insait long 40 askim. Em i abrusim ol toktok bilong wok bung bilong developmen na ol toktok bilong tred, tasol ol askim i karamapim tu ol samting olsem pis na sekuriti, pait blong daunim terorisem na ol ogenais kram, ikonomi gro bilong olgeta we bai stap longpela taim, maigresen, politikal wok bung na planti narapela toktok i stap long ajenda. Dispela konsaltesen bai go inap 12 wik.

Dispela konsaltesen bai kamap wanpela bikpela hap bilong wok analisis Komisn bai kamapim long yia 2016. Em bai skelim strong bilong dispela Patnasip Agrimen na tu long ol gutpela wok kamap.



Ol de sift o detaim wokman meri bilong Ramu NiCo MCC long Basamuk Rifaineri i kalap long bikpela bas long go long taun.

Poto: James G.Kila

Kumul Petroleum strongim wokbung wantaim Sojitz

KUMUL Petroleum i strongim pasin poroman na wokbung namel long wanpela petrokemikal kampani bilong Japan.

Dispela kampani em i Sojitz Kopresen bilong Japan. Kumul Petroleum na Sojitz i bin sainim wanpela agrimen dispela yia long kirapim wanpela petrokemikal industri o plent insait long PNG.

Dispela petrokemikal plent bai kamap klostu long PNG LNG Plant sait ausait long Pot Mosbi. Las wik taim Praim Minsta Peter O'Neill i go raun long Japan, ol bikman bilong Kumul Petroleum na Sojitz tu i bin sainim narapela agrimen long larim Sojitz i painim ges long PNG.

Siaman bilong Kumul Petroleum Frank Kramer, menesing dairekta Wapu Sonk na Pablik Entaprais Minista Ben Micah i bin witesim dispela agrimen sainin long Tokyo, Japan.

Ol bikman bilong Sojitz Kopresen olsem Presiden na CEO Yoji Sato na menesing dairekta Tsutomu Tanaka i bin stap tu long hap long

sainim dispela agrimen.

Aninit long dispela agrimen, Sojitz na Kumul Petroleum bai kirapim wanpela nupela kampani ol i kolim PNG Methanol Industri Limited. Dispela kampani bai kamap olsem wanpela spesol pepes kampani we em bai ranim wanpela petrokemikal plent ausait long Pot Mosbi.

Long pastaim agrimen tupela kampani i bin sainim, Kumul Petroleum na Sojitz i bin wanbel long larim Sojitz bai painim ges insait long PNG.

Sojitz bai yusim dispela ges long kamapim ol nupela samting olsem fetilaisa, wara paip, plastik beg, polima, na ol arapela samting aninit long dispela petrokemikal plent.

Mista Sonk i tok PNG Methanol Industri Limited bai kirapim ol fisibiliti stadi long kamapim dispela methanol plent long Konebada Petroleum Pak ausait Pot Mosbi.

"Sojitz na Kumul i sainim dispela agrimen long larim dispela nupela kampani i ki-

rapim dispela fisibiliti stadi. Dispela nupela kampani bai makim maus bilong tupela mama kampani yet," Mista Sonk i tok.

Em i tok dispela seahola sainin agrimen long Tokyo em i wanpela namba wan rot we tupela kampani i mekim long strongim poroman namel wok bisnis bilong tupela long PNG.

"Long mun Epril Sojitz na Kumul i bin sainim wanpela agrimen pinis. Nau dispela agrimen bai strongim wokbung namel long tupela kampani," Mista Sonk i tok.

Em i tok dispela methanol projek bai kamap namba wan projek we em bai kamapim ol prodak long PNG yet na bai salim i go aut long ol arapela kantri.

"Long yia 2030, dispela methanol projek bai mekim moa long K429 milen long PNG. Dispela em i bikipela mani tru na em i wanpela gutpela samting Kumul Petroleum i mekim long kirapim petrokemikal industri long PNG," Sonk i tok.

K80 milien long Yalibu-Kagua rot kontrak

Frieda Sila Kana i raitim

EKTING Gavana Jeneral, Theo Zurenuoc i bin lukim Seketeri bilong Dipatmen bilong woks David Ware, i sainim wanpela kontrak agrimen wantaim COVEC (China Overseas Engineering Group Co. Ltd) long mekim bikipela wok kontraksen long hap rot namel long Yalibu na Kagua, long Sauten Hailans Provins.

Dispela Saina Ovasis Enjinia Kampani bai wok wantaim ol lokal kontrak kampani we ol yet bai lukim na makim long mekim dispela wok bilong stretim rot. Olgeta mani

bilong dispela projek i sanap long mak i winim K80 milien.

Tony Liu, Ekting Jeneral Menesa na Sheldon Ding, Bisnis Menesa i bin makim China Overseas Engineering Group long sainim dispela wok kontrak.

Wanpela opisa bilong Gavman Haus i bin ritim tok orait bilong dispela wok kontrak olsem ol i bihainim olgeta rot aninit long lo bilong Sentral Suplai na Tenda Bod long givim aut dispela kontrak. Dispela kampani i wokim ol narapela bikipela rot kontraksen tu i stap nau long bikipela hailans haiwe.

Mani bilong dispela bikipela

wok kontraksen bilong hailans haiwe em i kam aninit long patnasip bilong PNG Gavman wantaim Esien Development Benk (ADB).

Seketeri bilong Woks, Mista Ware i tok ol i gat strongpela tingting olsem wok bilong rot namel long Kagua na Yalibu bai stat pastaim long dispela yia i pinis.

Dispela helpim mani bilong ADB i kam long tripela hap, Trens I, Trens II na dispela em i Trens 3 na em i go long tripela rot kontraksen projek bilong Hailans Haiwe. Tupela bilong ol dispela hap wok em i pinis na em wankain kampani tasol i wokim.



Seketeri bilong Woks, David Ware i sainim kontrak bilong rot kontraksen wantaim Jeneral Menesa bilong China Overseas Engineering Grup, Tony Liu na Bisnis Menesa Sheldon Ding long ai bilong Ekting Gavana Jeneral, Theo Zurenuoc long Tunde. Foto: Gavman Haus

Yunaitet Nesens Seketeri Jeneral toktok long Wol Fud De

SEKETERI Jeneral bilong Yunaitet Nesens i mekim ol toktok long luksave long Wol Fud De i bin kamap long las wik Sarere.

Dispela yia bilong luksave bilong Kaikai i bihainim wanpela bikipela samting ol lida bilong wol i mekim wantaim 2030 Ajenda bilong Sasstenebol Dvelopmen, olsem ol 17 gol o bikipela tingting long givim stia long ol wok bilong ol i go long bihainim taim long graun bai stap gut.

Seketeri Jeneral Yunaitet Nesens i tok, wanem kain wei yumi laik gro, wokim wok na long serim na kaikai ol samting em i save kamapim senis long ol pipel, graun, gutpela sindaun na bel isi.

Bilong bihainim tok promis bilong 2030 ajenda bai i no inap kamap sapos yumi no hariap long pinisim hangre na i nogat gutpela nutrisen long ol pipel. Long wankain we, mekim wok bilong pinisim pasin bilong hangere bai i no inap long kamap sapos i no gat bikipela senis i kamap

bihainim nupela ajenda.

Sastenebol Dvelopmen Gol 2 i singautim yumi long "pinisim hangere", kamapim fud sekyuriti na kamapim gutpela nutrisen na strongim gutpela egrikalsa".

I gat sampela gutpela wok i kamap pinis long yia 2000 we namba bilong ol pipel husat i no kisim gutpela nutrisen i go daun. Long wankain taim tu insait long wol em klostu wanpela hap bilong olgeta kaikai i kamap em i lus o i bagarap nating. Na long wanem hap i gat inap kaikai bilong olgeta, klostu 800 milien pipel i stap hangre yet.

Rot bilong kamaut na lusim ples bilong poveti em i kamap isi, isi tumas.

Bikipela tingting bilong Wol Fud De 2015 em Sosel Proteksen na Egrikalsa: Brukim Saikel bilong Rurel Poveti i soim aut bikipela wok bilong mani transfe, insurens, pensen na ol sosel proteksen program long helpim ol pipel i gat bikipela nid long

lukautim gut laip bilong ol long taim bilong hevi.

Siro Hangre Salens we mi tokaut long en long yia 2012 i strongim tingting bilong nesnel lidasip i mas wok wantaim planti lain stekholda. Bilong pinisim hangre em i wok bilong olgeta lain. Ol fama, saientis, intenesenel ogenaisesen, ol ektivis, bisnis na ol lain bilong kaikai i gat wok long mekim.

Kamapim ol fud sistem we bai strong long taim bilong hangere, na em bai lukluk long olgeta lain na i no sampela lain tasol na em i singaut long yumi long i mas givim moa pawa long ol meri fama, ol yangpela na long putim mani long ol smolholda fama.

Hangre em i no toktok long sot long kaikai tasol, nogat. Em i wanpela wansait pasin i save kamap long wol. Long de bilong luksave long Wol Fud De, yumi mas putim tingting na wok bung wantaim long pinisim taim hangre long laip bilong yumi.

Sovren Welt Fan bai kamap neks yia

TRESERA Patrick Pruaitch i tok gavman bai kirapim PNG Sovren Welt Fan (PNG SWF) long yia 2016.

Em i mekim dispela toktok long 2016 Baset Strateji Pepa (BSP) long kirapim Nesnel Baset bilong neks yia.

PNG SWF em i wanpela namba wan samting long sevim mani gavman bai kisim long ol risos projek olsem maining na petroleum projek.

Gavman i pasim pinis wanpela Ogenik Lo long kirapim dispela SWF tasol gavman i no kamapim opis o seketeriat we ol bod ov dairektas bai sindaun long lukautim mani bilong dispela kantri insait long SWF.

Mista Pruaitch i tok nau yet yumi nogat dispela seketeriat tasol Ogenik Lo bilong kamapim seketeriat, makim

ol bod memba na hao long yusim dispela mani i stap pinis.

"PNG SWF em i wanpela gutpela samting we gavman i ken lukautim ol mani bilong kantri na pipel we bai kam long ol maining, petroleum na ol arapela projek," Mista Pruaitch i tok.

Mista Pruaitch i tok long yia 2016, gavman bai kirapim ol opis na ol arapela opresenal samting bilong PNGSWF.

Em i tokaut klia olsem mani bilong PNG LNG Projek bai go insait long SWF bihain long yia 2020.

"Taim PNG LNG i bekim ol dinau mani ol projek patna i bin kisim long kirapim dispela projek, PNG bai kisim skel bilong en bihain long yia 2020," em i tok

Nau yet, nogat wanpela

man i save long wanem hap stret dispela mani bilong PNG LG Projek we gavman inap long kisim long 16.6 pesen sea em i gat aninit long Kumul Petroleum.

Ol save man long Nesnel Risets Institut (NRI) i bin kamapim wanpela gutpela samting long kirapim SWF.

Tasol gavman i no bihainim dispela toktok na ol samting NRI i givim long en.

Dairekta bilong NRI Dokta Charles Yala i tok em i no save long wanem hap mani bilong LNG Projek i stap.

"PNG i nogat SWF we mani gavman bai kisim long LNG Projek bai kam stap. Mipela i no save we dispela mani i stap," Dokta Yala i tok.

Bipo gavman bilong Gren Sif Sir Michael Somare i bin kamapim dispela tingting bilong kirapim SWF.

Singaut long ol Enga long senisim pasin

Pato Potane, em i praivet loya na papa bilong Wabag Lodge long Enga Provins. *Poto: Frieda Sila Kana*

Frieda Sila Kana i raitim

WANPELA Praivet Loya bilong Enga Provins, Pato Potane i bin mekim strong-pela toktok i go long Enga Komyuniti long Pot Mosbi long senisim pasin na no ken tromoi mani tasol long taim man i dai pinis, tasol ol i mas helpim sikman taim em i stap yet long haus sik.

Dispela toktok em Mista Potane i bin mekim long las wik Sande 18 November, long taim bilong Enga Fanresing bilong helpim ol lain husat i kisim bikpela bagarap long ais na bikpela san long ol distrik bilong Enga olsem Kandep na ol narapela hap. Dispela fanresing bung em, Gavana bilong Enga yet, Gren Sif, Sir Peter Ipatas i go pas long en wantaim Enga Developmen Forum.

Dispela em i bin namba tu taim we Sir Ipatas na ol lain bilong em i bin holim wanpela bikpela fanresing bilong helpim ol pipel bilong Enga. Pastaim tru ol i bin holim wanpela long mun Ogas na ol i bin kisim mani mak long K950,000 we ol i bin bringim kaikai i go long ol pipel bilong Kandep Distrik.

Long dispela taim nau, Mista Potane i bin givim wanpela sek bilong K2,000 bilong isapotim wok bilong bringim kaikai long ol pipel bilong en long Enga. Em tu i givim long



namba tu taim. Bilong wanpela pastaim long namba wan fanresing em meri bilong en i bin putim K1,000 long nem bilong Wabag Lodge, em famili bisnis bilong Mista na Misis Potane.

Mista Potane i tok, em i no amamas tru long kain pasin we ol lain bilong Enga Provins husat i stap long Mosbi i mekim long taim planti i no kamap, na liklik lain tru i bin kamap long fanresing bung long Bluff Inn Hotel long 17 Mail long Sande apinun.

"Mi putim salens long ol pipel bilong Enga olsem. Taim wanpela Enga man i sik long haus sik, no gat man i save go na lukim em na helpim long baim haus sik na

marasin bilong em. Tasol, taim wanpela Enga man i dai, oloboi, ol Enga i save kam wantaim pik, mani na kaikai long haus kraik bikos ol i laikim narapela taim sapos em i gat dai bai ol dispela lain bai helpim em," Mista Potane i tok.

"Tude yumi mas gat moa pipel i kamap long hia long sapatim wok bilong Gavana. Tasol no gat. Na dispela pasin bilong ol lain bringim ol lapun bilong ples long Wabag i kam long Pot Mosbi em ol i mas stopim. Ol i save kisim i kam long taim ol i dai nau bai mani bai ol i westim long haus kraik na long baim balus i go bek gen long Wabag," Mista Potane i tok.

Enga fanresing kamapim K300,000 long Pot Mosbi

Frieda Sila Kana i raitim

ENGA Komyuniti long Pot Mosbi i kisim salens long bungim mani bilong helpim ol pipel bilong ol husat i kisim bagarap long bikpela san na ais i pundaun long ples.

Long wanpela moa fanresing bung long Bluff Inn Hotel, long Sande 18 Oktoba, ol liklik lain Enga na sampela ausait lain i kamap taim ol i harim singaut long midia na ol invaitesen pas i go long ol, i bungim mani inap long K260,000 kes na promis mani.

Maski planti pipel i no kamap long dispela apinun bung, ol liklik lain husat i kamap i putim sek mani na promis mani long ol kain mani mak namel long K200 i go long K10,000 long wan wan famili, bisnis na kampani.

Wanpela man bilong Laigam, em John Kaio, em i

bikman bilong Nesanel Rot Sefti na Atoriti i givim K2,000 na em i askim long ol lain bilong Gavana Ipatas na ol provinsal disasta komiti long ol i mas tingim ol pipel bilong en long hap bilong Pogera. Dispela man i wari tru long ol pipel bilong em bikos ol i gat trabel pait na em i no save ol i stap we nau.

Na tupela man, nau i stap wok long Australia i salim fon teks long promis long putim K2,000. Pastaim Geming Bod CEO, Joe Krammer i putim K2,000 na Was Amu bilong Wap & Co Sekyuriti kampani i putim K 5,000 bilong inapim tok promis bilong em. Sampela investa bilong Saina na bisnis patna bilong Embeseda Evan Paki bilong Lenki viles, i givim wanpela K6,000 sek na tok promis long givim narapela K4,000 bihain bilong mekim i go K10,000.

Tasol dispela olgeta mani wantaim i no inap yet long pulimapim hangre bilong olgeta 187,000 pipel bilong Enga nau i kisim taim.

Gavana bilong Enga, Gren Sif, Sir Peter Ipatas i bin holim pres konpres long taim bilong fanresing na i tok, em i no inap toktok long hevi bilong ol narapela provins tasol em i save long hevi bilong ol Enga na em i toktok.

Em i no sindaun tasol na wetim mani bilong gavman, nogat. Em i go aut long komyuniti na traim long painim mani ausait long gavman long helpim ol pipel bilong en.

Long wankain taim em i singaut long ol Memba bilong Enga long no ken pilai politik na tingim ol nid bilong ol pipel na wok bung wantaim Provinsal Gavman na Disasta komiti long bringim helpim i go long ol pipel.



Lida bilong ol Saina investa, i sekhan na i givim K6,000 sek long Eksekutiv Dairekta bilong Enga Developmen Forum na Kodineta bilong Enga Ais Disasta Rilif, Peter Misionyaki long taim bilong Bluff Inn Fanresing. *Poto: Frieda Sila Kana*

Goilala DDA autim 2015 Baset

GOILALA Distrik Developmen Atoriti (GDDA) i bin wokim namba wan miting bilong em ausait long ai bilong pablik we ol ples na komyuniti tupela wik i go pinis insait long Tapini gavman stesin, bihain tasol long ol memba bilong DDA i givim tok promis bilong ol long holim wok na tu long oli tokaut long 5 yia divelopmen plen 2015- 2019.

Ol memba bilong DDA i go het na putim aut wanpela bikpela baset tru long rekot bilong Goilala distrik wantaim K30 milien long sotpela taim histori bilong em.

Nupela Memba bilong Goilala, William Samb husat i siaman bilong DDA i bin stap tu long lukim olsem ol besik sevis bai go stret long ol pipel long ol dispela hamas mun i stap yet bipo long 2017 nesanel ileksen bai kamap.

Long taim bilong givim 2015 baset, Samb i salesim ol pablik sevan long wok

strong na bringim sevis long ol pipel we ol i no bin save kisim long taim bilong independens yet i kam inap nau.

Em i tok ol pablik sevan i mas oltaim mekim gut wok akauntabiliti na mekim long ples kliia long sevis i mas go stret long ol pipel gut.

"Yumi, olsem ol memba bilong dispela atoriti i mas wok strong long rausim dispela nem nogut olsem Goilala em i rabis ples na ol pipel bilong en i no gutpela. Yumi mas kamapim nupela lukluk na tanim histori na tingting bilong ol pablik long Goilala na wok strong long bringim dispela las ples long baksait i kam long fran lain na namba wan insait long narapela 10-pela yia i kam bihain," em i tok.

Samb i tok strong olsem Goilala distrik edministresen i save stap na mekim wok bilong en long Konedobu, long NCD olsem na no gat

sevis i save kamap. Em i askim ol pablik sevan long go stap long Tapini na taim ol mani i go aut, edministresen opis bai hariap long kirapim ol projek na program insait long ol mun i stap yet.

Mista Samb i tok, distrik i no gat ol trak na em i tok promis long baim ol trak bilong wan wan ki sekta long mekim wok bilong ol gut na gutpela gavanens long hariap long bringim sevis long ol pipel bilong Goilala.

Bikpela hap mani bai i go long stretim Tapini Haiwe wantaim K8 milien alokesen, bikos haiwe tasol em i rot i bringim Tapini go bung wantaim Mosbi na mekim laip isi long ol pipel i kisim ol besik sevis na long bringim ol gaden kaikai bilong ol i go salim long siti.

Samb wantaim DDA bod i makim tu K195 milien long stretim Doa-Tolokuma rot. Em i mekim luksave tu long wanem samting, pastaim



memba, Daniel Mona i bin wokim pinis.

Em i luksave long kain hatpela ples bilong wokabaut

olsem na em i givim tok orait long wanpela K3 milien long baim wanpela tu ensin balus, "Spirit of Goilala".

L-R Memba bilong Goilala, William Samb i givim Distrik Plen i go long opisa bilong DIRD.

Poto: Samson Kenderman



Nupela kakao Neseri long BSK taunsip strongim PPP



Ol liklik meri i bilas na holim kakao sidling wantaim VP Mista Xu na Mr Hu

WANPELA naispela seremoni i bin kamap long Basamuk taunsip long Raikos distrik long las wik Fonde, we i lukim ol lain bosman bilong Ramu NiCo (MCC) i bung wantaim ol famas na givimaut ol nupela kakao sidling i go long ol lain famas.

Tupela Vais Presiden bilong Ramu NiCo (MCC) long Basamuk, Mista, Mr Xu Jian na Mr Hu Zhiliang i bin stap long givim aut ol dispela kakao sidlings we i kamaut long nupela kakao neseri bilong Ramu NiCo long Basamuk taunsip.

Dispela kakao neseri projek i kamap bihainim pablik-praivet patnasip wok Ramu NiCo i kamapim long yia 2013 wantaim PNG Kakao Kokonas Institiut long strongim wok bilong kakao prodaksen insait long Basamuk eria. Long dispela taim ol CCIL wantaim Vais Presiden bilong Ramu NiCo, Mista Wang Baowen i bin lonsim dispela kakao neseri projek long Tugyag.

Long las wik Ramu NiCo i strongim yet dispela wok bilong PPP na tu promotim ol nupela kakao klon we i ken abrusim sik kakao pod bora (CPB).

Dispela nupela kakao neseri long Basamuk taunsip insait long eria we ol wokman meri bilong Ramu NiCo i save stap long en i bin

kamap bihain long tok-orait na wok bung namel long Komyuniti Afes Dipatmen agrikalsa opisa, Tony Gaiyu. Ol dispela kakao em ol saveman bilong PNG Kakao Kokonas Institiut (PNGCCIL) i bin wok klostu wantaim Ramu NiCo long wokim bading na tu redim gut long givim aut long ol famas husat i memba bilong Basamuk Kakao Kopretiv Sosaiti Grup (BCCSG).

Long toktok bilong en long seremoni, Vais Presiden Xu i tok dispela kakao neseri i soim gutpela wok developmen bung we i kamap namel long Ramu NiCo na lokal komyuniti long Basamuk eria long strongim ekonomik developmen. Dispela bai helpim ol pikinini na ol tumbuna long bihain taim taim nikel/kobalt projek i pinis.

Mista Xu, husat i makim maus bilong ol Ramu NiCo bosman i tok dispela kakao neseri long Basamuk taunsip em i strongim wok long sait long ekonomik developmen namel long kampani na ol lokal papagraun. Na em i soim olsem Kampani i gat bilip long lukim olsem ol lokal pipel i ken holim graun moa na wokim wok na strongim sindaun bilong ol long ples long agrikalsa wok.

Seketeri bilong BCCSG, Mista Simon Douglas i tok ol famas i amamas tru olsem nau ol i gat wanpela permanen kakao neseri long

Basamuk taunsip. Dispela bai helpim long groim na kamapim ol gutpela kakao sidlings we i ken abrusim sik kakao pod bora (CPB).

Mista Douglas i tok BCCSG i amamas tru, long Ramu NiCo wantaim ol developmen patna bilong en olsem taim dispela neseri i stap, ol bai no inap moa long go kam long CCIL long Murunas long not kos rot (NCR) long Madang long kisim ol kakao sidlings na ol bad-stik long wokim ol kloning wok.

Mista Douglas wantaim ol memba bilong BCCSG i givim bikipela tok amamas long Ramu NiCo long givim grup bilong ol wanpela opis spes na tu sed o eria long salim ol agrikalsa saplai bilong ol. Moa long en tu ol Mista Douglas i tok amamas long Ramu NiCo long givim ol onasip setifiket long kisim olpela mes bilding wantaim tupela 20-fut kontena long karimaut ol wok bisnis bilong BCCSG.

Strongpela CA wokman long sait long egrikalsa long Basamuk Rifaineri, Tony Gaiyu i givim strongpela salens nau i go long ol kakao fama long Basamuk long holim graun na wok hat wantaim kakao diwai bilong ol. Em i tok wanem samting ol i wokim nau bai bringim gutpela kaikai na helpim long ol wantaim pikinini na tumbuna bilong ol long bihain taim.



Ol famas wantaim ol Ramu NiCo bosman i soim ol kakao sidling sol i kisim



Mista Douglas na Mista Tony Gaiyu i soim tupela Vais Presiden bilong Ramu NiCo long nupela neseri



Ol BCCSG famas i redim naispela frut na kaikai bilong ol Ramu NiCo bosman



Ramu NiCo Management (MCC) Ltd,
 the manager of Ramu NiCo Project is proud to host the 5th
NATIONAL MINING EMERGENCY RESPONSE CHALLENGE
 in Madang
 Date: August 22-25, 2015
 Venue: DWU & PNG Maritime College



Wallabies i daunim ol Skotlan



AUSTRALIA Wallabies i bin daunim ol Skotlan wantaim wanpela poin 35-34 long Ragbi Wol Kap kwata fainel pait na i tok tenkyu long Bernard Foley long kisim wanpela penelti gol.

Australia i stap baksait na ol Skotlan i stap pas wantaim tupela poin taim tupela minit i stap yet long bungim pinis bilong pilai.

Tasol, referi i bin givim penelti egensim ol Skotlan long ol i bin stap pas long referi long lain, na Foley i gat sans long larim sait bilong em i stap laip yet long dispela resis bihain long em i bin kisim tripela poin aninit long bikpela presa.

Pilaia bilong ol Skotlan, Mark Bennett, i bin stilim bal bilong ol Australia na i putim wanpela trai na ol Skotlan i amamas nogut tru bipo long Foley i kikim ol Wallabies i go insait long semi-fainel bam egensim ol Ajentina long long Twickenham long dis-

pela wiken.

Ol Skotlan i bin putim 5-pela trai taim Australia i bin putim 3-pela trai na ol Australia i strong tumas long brukim ol Skotlan, tasol ol Skotlan i lokim gut ol Australia bikos namba wan pilai bilong ol Australia, David Pocock, i no bin pilai.

Stronpela man bilong Wol Kap, Drew Mitchell, i bin putim narapela tupela trai bilong ol Wallabies lon win.

Long narapela sait, Greig Laidlaw, i skruim poin bilong ol Skotlan i go antap long 19 poin wantaim but bilong ol Skotlan taim Peter Horne na Tommy Seymour i skorim tupela trai bipo long trai bilong Bennett.

Kapten bilong ol Wallabies, Stephen Moore, i amamas long ol Skotlan i bin pilai strong.

"Mi ting em i wanpela gutpela tes pilai bikos Skotlan i bin pilai gut tru," Moore i tok.

"Ol sapota bilong ol i mas amamas long ol i pilai gut, olsem mi i bin mekim long ol boi bilong mi."

Kosa bilong Australia, Michael Cheika, i tok "Ol Wallabies i laki long kisim dispela penelti bikos ol i no pilai gut.

"Dispela em i bikpela gem na mipela i laki long go insait.

"Mipela i no bin pilai gut, tasol mipela i pinisim wok bilong mipela. Mipela i putim 5-pela trai na mipela bai pilai olsem yet, nogat i no olsem.

"Mipela i no bin strongim banis bilong mipela na ol i bin putim wanpela trai, na tu pas bilong mipela i go karangi tumas na Skotlan i bin stilim bal na putim narapela trai gen.

"Dispela em i no gutpela tumas we nau mipela bai blokim dispela eria."

Cheika i tok sait bilong em i gat planti rum i stap yet long mekim i luk orait.

Laidlaw i no amamas long fainel penelti

Ol foto: ABC



KAPTEN bilong ol Skotlan, Greig Laidlaw, i no bin amamas long ol i kisim penelti long kwata fainel na i bin lus long ol Australia Wallabies.

Laidlaw i laik long save long wanem as tru, referi Craig Joubert i feil long lukim ol Televisen Met Opisal (TMO) lain bipo long givim penelti we ol Australia i bin win wantaim wanpela poin long Ragbi Wol Kap kwata fainel.

Ol Opisal bilong Saut Afrika i tok olsem dispela penelti referi i givim em i bikpela samting bikos em i bin mekim wanpela bikpela disisen long kwata fainel na ol i ken lukim ol TMO.

Laidlaw i tok em i panim ol toktok long mekim bikos dispela kain disisen em ol referi i save lukim ol TMO long strongim disisen bilong ol

tasol em i no mekim olsem.

Kosa bilong ol Skotlan, Vern Cotter, i tok referi i bin mekim namba wan disisen tasol em i stap isi, bikos pilaia bilong ol Australia, Nick Phipps, i kisim bal na bihain prop bilong ol Skotlan, Jon Welsh, i kisim bal long han bilong Phipps taim em i stap opsait. Planti lain i tok dispela em i no stretpela disisen.

"Wankain olsem long dispela penelti we referi i bin givim egensim ol Skotlan," Cotter i tok.

Bipo Australia pilaia, Michael Lynagh, i tok long ITV olsem," TMO sistem i ken rulim dispela pilai long stat bilong en na i go inap long pinis bilong en, tasol long wanem ol i mekim olsem em mi i no gat aidia long dispela."

Bipo kapten bilong Skot-

lan, Gavin Hastings, i tok, "Referi i no save mekim ol stretpela disisen long olgeta taim, nogat. Ol i save mekim sampela asua tu long taim bilong mekim disisen na TMO sistem i stap long painim aut dispela kain karangi disisen."

"Dispela em i kwata fainel bilong Ragbi Wol Kap na mipela i kam long mak bilong pilai em i bikpela samting tru na wantaim dispela, mi laikim ol long stretim dispela disisen i kamap stret."

Ol i askim Kosa bilong Australia, Michael Cheika, na em i bin tok olsem, "Referi i bin givim penelti egensim ol Skotlan na mipela i kik. Yupela i ken kik tu, sapos dispela em i penelti egensim mipela."

All Blacks i daunim Frans



NU SILAN All Blacks i daunim ol Frans 62-13 long Ragbi Wol Kap long Mile-niem Stadium long Cardiff na i kisim ples bilong pilai semi-fainel agensim ol Saut Afrika Springboks.

Ol All Blacks i ran strong na putim 9-pela trai na dispela em i bikpela skoa tru ol i kisim aninit long salens bilong Frans na nau ol bai bungim ol Springboks long Twickenham long dispela Sande.

Ol Springboks i go pas wantaim 4-pela win na namba

foa em ol i bin daunim ol Wales 23-19 long kwata finel long Twickenham.

"Dispela em i narapela kain kala ol i soim long pilai bilong ol na i no gat wanpela tingting karangi mipela i gat, no gat tru," Kosa bilong All Blacks, Steven Hansen, i tok.

Winga bilong ol Nu Silan, Julian Savea, i putim tripela trai na skruim trai bilong em long tonamen i go antap long 8.

Flai hap bilong All Blacks, Dan Carter, i lukluk gut na

kisim 17 poin wantaim but bilong em wantaim wanpela fil gol em i bin kisim long namba 5 minit long opim skoa bilong ol taim ol i stat pilai.

Dispela win em i namba 9 win bilong ol Nu Silan taim ol i save salensim ol Frans. Nu Silan i save daunim ol Frans wan sait.

"Olgeta samting mipela i mekim long nau i bringim mipela i go insait long pilai semi-fainel," Kapten bilong ol All Blacks, Richie McCaw, i tok.

Ajentina i daunim Ailen



AJENTINA Puma i tromoi ol Irelen i go bek, bihain long ol i win 43-20 long Ragbi Wol Kap na i go insait long semi fainel we dispela em i makim namba tu taim bilong ol.

Namba wan trai em senta pilaia, Matias Moroni, i bin putim na namba tu trai em winga bilong ol, Jaun Imhoff, i putim long ai bilong 72, 316 manmeri i bin stap insait long Milenium Stediam.

Ol Puma i stap 17-0 bihain long 14 mini taim Sanchez i kikim wanpela kik i go insait.

Ol Irelen i pait bek wantaim tupela trai we winga bilong

ol, Luke Fitzgerald, i bin putim namba wan trai long 24 minit na Jordi Murphy i bin putim namba tu trai taim ol i go insait long namba tu hap bilong pilai na ol i stap pas wantaim 3-pela poin 20-17.

Dispela i luk olsem ol Ailen i pilai long winim ol Ajentina, tasol kala bilong ol Ajentina i kamap namba wan tru taim ol i pilai.

Ol i bin pasim bal i go i kam na trikim ol Ailen gut tru na Moroni i bin putim narapela trai gen long kona bihain long 4-pela minit.

Bihain long 6-pela minit ol

Ailen i bin putim wanpela trai gen we Juan Martin Hernandez i bin putim bikos long wankain taim ol i rausim prop bilong ol Puma, Ramiro Herrera, long em i bin mekim wanpela strongpela takel. Spes bilong prop bilong Ajentina i stap yet na ol Irelen i gat sans na i bin putim dispela trai.

Ol Alien i bin putim narapela trai gen tasol ol Ajentina i strong tumas bikos ol i save bipo go insait long semi fainel bipo na nau ol i no givim wanpela spes long ol Ailen, maski ol Irelen i bin putim ol trai.

Real Blacks i kamap wina bilong UPNG Soka Asosiesen gren fainel

Philemon Tame i raitim

REAL Blacks em i soka tim bilong ol Bogenvil sumatin long Yunivesiti bilong Papua Niugini (UPNG) i bin kamap sempion bilong UPNG Soka Asosiesen gren fainel i bin kamap long las wik Sande long UPNG pilai graun.

Oi Blacks i bin daunim ol Morobe United, 2-0.

Oi boi husat i bin werim orens siot i strong tumas na pilaia bilong ol, Patrick Aisa, i bin skoim namba wan gol long namba 8 minit bilong pilai.

Oi Morobe United i bin traime strong planti taim long kisim sampela skoa tasol banis bilong ol Blacks i bin strong tumas.

Morobe i gat sans na i kam klostu tru long net bilong ol

Blacks, tasol taim bilong malolo i bungim ol we ol i no bin kisim wanpela skoa, na skoa i bin sanap olsem 1-0 long namba wan hap bilong pilai.

Namba tu hap bilong pilai i bin kamap moa strong we ol pilaia bilong tupela tim wantaim i bin yusim olgeta skil na trik bilong ol, na olgeta sapota bilong tupela tim wantaim tu i bin sanap long sait na i bin sapotim strong, tim bilong ol ausait long pilai graun.

Insait long 20 minit long namba tu hap bilong pilai, pilaia bilong ol Morobe, Asa Willie, i bin skulim referi gen insait long pilai graun na ol i bin rausim em long pilai graun.

Oi Blacks i skruim strong bilong ol i go antap moa yet taim 9-pela minit i stap yet long bungim pinis bilong pilai we pilaia bilong ol, Edwin Taberia, i

bin skoim namba tu gol bilong ol Blacks i bin bringim skoa bilong ol i go antap 2-0 na daunim ol Morobe.

Real Blacks i winim K10 000 prais mani we ol bai presentim i go long ol tumora (Fraide), 23 Oktoba.

Kosa bilong ol, Quinten Nukuitu, em i yia tu sumatin long UPNG i bin amamas long tim bilong em na i tok ol i save pinis olsem ol bai winim dispela pilai bikos ol i no bin lus long wanpela taim.

"Hatwok bilong mipela i kamap long mak olsem, long wanem, mipela i save wok hat tru long stadi na trening wantaim," Nukuitu i tok.

Tim Menesa bilong ol na yia tri sumatin, Trevor Wahuna, i tok tenkyu long sponsa bilong ol, Thomas Tabere na Buin Guest Haus, long ol i bin redim ol yunifom bilong tim.

Warriors na Royals i kisim wankain skoa, 14-14

Philemon Tame i raitim

DOBO Warriors na Moresby Royals i pinisim fainel raun bilong pilai long Pot Mosbi Ragbi Lig resis wantaim wankain skoa 14-14 long Murray Bareks pilai graun long las wik Sande.

Dispela em wanpela strongpela pilai i bin kamap namel long A Gret we tupela sait wantaim i strongim banis bilong tupela, na tu i strong long kisim wankain poin.

Long namba wan hap bilong pilai, pilaia bilong ol Warriors, Junex Steven, i putim namba wan trai long namba 9 minit bilong pilai, na bihain long 6-pela minit, Simpi Fred, i putim narapela trai gen.

Oi Warriors i stap pas long 16 minit bilong pilai wantaim 8 poin bikos kik bilong tupela

tra i wantaim i no bin go insait.

Oi Royals i no bin westim taim long bekim trai bilong ol Warriors bipo long namba wan hap bilong pilai i pinis, we ol i bin putim namba wan trai bilong ol na i bringim skoa bilong ol i kam antap long 6 bikos kik bilong ol i go insait.

Skoa i bin sanap olsem Warriors i bin stap pas yet wantaim 8 poin na Royals i bihainim em wantaim 6 poin na taim bilong malolo i bungim ol.

Bihain long malolo, pilai bilong ol Royals, Wapi Mori, i bin putim namba tu trai na skruim skoa we ol Royals i stap pas wantaim 10 poin bihain long kik bilong ol i no bin go insait.

Wanpela trai we Mex Wemin i bin putim bihain long 10 minit, i bringim ol Warriors

i kam antap gen long 12 poin na ol i stap pas bihain long kik bilong ol i no bin go insait.

Taim i bin kamap klostu long bungim pinis bilong pilai na tupela tim wantaim i bin stap long wanpela kain presa taim Warriors i bin stap pas wantaim tupela poin 12-10.

Steven Gia i putim namba 3 trai bilong ol Royals na i stap pas wantaim 14 poin bihain long kik bilong ol i no bin go insait.

Oi Royals i bin mekim wanpela asua na referi i bin givim penelti i go long ol Warriors klostu long trai lain bilong ol Royals. Warriors i kikim penelti kik i go insait na levelim skoa bilong ol 14-14 long pinis bilong pilai.

Dispela em i raun namba 25 na fainel pilai bilong ol bai kamap long dispela wiken.

Phoenix bai kisim K10, 000 long em i bin kamap sempion

Philemon Tame i raitim

PHOENIX i kamap sempion bilong soka resis bilong ol meri long Yunivesiti bilong Papua Niugini (UPNG) Soka Lig i bin kamap UPNG soka pilai graun.

Gren fainel bilong ol i bin kamap long las wik Sande we ol Phoenix i egensim ol Morobe tim husat i bin kamap sempion long 2013.

Oi Phoenix i daunim ol Morobe long dispela gren fainel resis na ol i bin winim K10, 000 prais mani we ol bai mekim presentesen long dispela wik Fraide.

Morobe i bin kalap i go pas wantaim wanpela penelti gol long namba wan minit bilong pilai.

Oi Phoenix i bung gen long kisim wankain poin bipo long bungim taim bilong malolo we Jessica Nawi i bin sanap long namel we em i bin kikim wanpela strongpela kik na i abrusim ol bek lain bilong ol birua sait na i go long poro pilaia bilong em, Esther Kurabi, na Kurabi i kik i go insait na poin i kamap 1-1.

Oi Phoenix i kam gen wantaim strong long namba tu hap bilong pilai na i strong yet na brukim banis bilong Morobe na traime 8-pela gol kik.

Faipela minit i stap yet long bungim pinis bilong pilai na ol Phoenix i bin lukim wanpela spes na pilaia bilong ol, Bethelle Kasir, i kisim bal taim wanpela birua pilaia i bin tromoi bal i go long tupela poro pilaia bilong em.

Kasir i tromoi i go gen long pro pilaia bilong em, Bertha Yapi, na Yapi i straikim bal wantaim rait lek bilong em i go insait long gol pos na skruim poin bilong ol i go antap long 2.

Oi Morobe i traime 8-pela taim long kisim gol, tasol ol i no kisim wanpela na pilai i pinis wantaim ol Phoenix i winim gren fainel resis 2-1.

HOLIM MI!



Senta bilong Difens i ranawe long pilaia bilong Hohola Flais long Pot Mosbi ragbi lig resis long Murray Bareks pilai graun. Difens i aut long fainel taim ol lus long Flais. *Poto Nicky Bernard.*

Flames Kap pinisim pre-sisen long las wiken

Philemon Tame i raitim

BASKETBAL resis bilong Sauten Flames Kap i bin pinisim pre-sisen pilai bilong em long las wiken wantaim bikpela luksave bihain long pilai i bin kamap insait long tupela wiken long Hohola Basketball pilai graun.

Propa sisen bilong ol bai kamap long dispela wiken we ol bai pilai tupela raun tasol.

Presiden bilong Flames, Kevin Teme, i tok pre-sisen em i bin kamap gut tru we olgeta tim i bin soim kala bilong ol na givim gutpela salens na i redi long pilai long propa sisen.

Risalt bilong ol i sanap

olsem ol Mix Warriors i bin daunim ol 4 Mail Majik, 45-39, na Kaugere Pacers i daunim ol Morata wantaim 4-pela poin 46-42.

Long pilai bilong ol meri, Gabutu i daunim Hox Butterfly wantaim tupela poin 16-14 na Sauten Waves i daunim ol Mix Souls 20-16.

Trukai i givim K50, 000 i go long PNG Weillifting

...i kam long bak pas

"Nau, mipela i tingting long salim tripela bilong ol top weillifta i go long Rio bihain long PNG Olimpik Komiti bai tok orait," Sir Dawanicura i tok.

Sels na Maketing Jenerel Menesa bilong Trukai, Andrew Daubney, i tok Trukai i amamas long kamap poroman bilong spot taim spot i gro kamap strong.

"Mipela bai sapot yet na mipela i ting olsem ol weillifta bilong yumi bai apim ol bikpela weit na ol i kamap namba wan weillifta na putim PNG long mep bilong wol olsem wanpela namba wan kantri long weillifting," Daubney i tok.

Long wankain taim, Sir John i tok rot bilong Steven Kari i op yet long em bai kam bek na trening wantaim long resis long dispela intanesenal event bai kamap.

Vais Presiden bilong PNGWF, Frank Robby, i tok, "Mi bin i go long haus bilong Kari long las mun long tok save long em olsem wanpela spesel pas i kam long Intenesenal Weillifting Federe-sen (IWF) bilong Kari long kisim ol skul

toktok insait long wanpela wik trening program long Noumea. Tasol, Kari i tok nogat long go long dispela trening program."

"Kari em i wanpela top weillifta insait long ol narapela wankain top weillifta olsem em long Osenia rijon na mipela i raitim pas i kam long em i ken kam trening wantaim long dispela wan wik trening program.

"Mi i no amamas taim em i mekim disisen bilong em, tasol mi rispektim disisen bilong em," Robby i tok.

Em i tok moa olsem Kari i no orait yet long wanpela bagarap em i bin kisim na dispela bagarap em i no aninit long weillifting, nogat. Em i bin kisim bagarap long narapela hap.

"Mi bai mekim disisen. Ol dispela neseneal event bai kamap long 2016 em Steven bai go insait yet bikos em i stap insait long famili bilong weillifting. Mipela i no pasim dua long em. Dua i op yet i stap long em bai i kam bek long trening," Sir Dawanicura i tok.

Homex Contractors sapatim ragbi lig long Takipa ples



Branny Libe i givim ragbi bal long long opisal bilong Tigipa lokol ragbi lig long Lowa Wage LLG, Margarima.

WANPELA bisnis haus long Margarima, Hela Provins i givim K5, 000 mani wantaim ol samting bilong pilai ragbi olsem ragbi bal na yunifom i go long wanpela liklik viles ol i kolim Takipa.

Menesing Dairekta bilong Homex Contractors Limited na mangi Margarima yet Branny Libe i givim dispela mani na ol samting i go long ol yangpela mangi long ples Takipa long Lowa Wage LLG, Margarima long las wiken tasol.

Mista Libe i tok kampani bilong en i amamas long helpim ol lokal manmeri long kirapim gutpela samting long ples na kamapim gutpela sindaun long ples.

Em i tok em i bin amamas long sapatim ol mangi long ples Takipa bikos ragbi em i wanpela spot o gem we em i save mekim ol yangpela mangi long ples i lus tingting long ol pasin nogut olsem stil, rip, kilim man, pulim mariwana na dring stim.

Mista Libe i tok long lukluk bilong en, em i luksave olsem lokol ragbi lig long Takipa ples em i wok long mekim ol yangpela mangi bisi long pilai na helpim ol yut long lus tingting long ol pasin nogut.

"Ragbi em i namba wan spot we planti yumi ol man-

meri PNG i save laik long lukim. Tasol ragbi i gat pawa tu long senisim laip bilong man na bringim bel isi na gutpela sindaun long ples."

"Dispela lokal lig long Takipa i save i wok long kamapim planti gutpela samting. Ol manngi i wok long mekim ol yet bisi long ragbi. Ol i wok long mekim ol awenes toktok long stopim mariwana na kampaim gutpela pasin long ples."

"Sampela ol mangi long ples i save pilai ragbi gut tru stret. Tasol ol i no save kamaut ples klia long ai bilong ol bikipela manmeri na skruim ragbi gem bilong ol i go moa yet long kain ol bikipela kompetisen olsem Digicel kap."

"Homex Contractors i luksave long ol dispela liklik lain long ples na mipela i amamas long helpim ol i kamap sempion ragbi pilaia long ples. Maski ol i no save kisim bikipela sapat, Homex i luksave long ol na mipela bai sapatim ol long bihain taim tu," Mista Libe i tok.

Mista Libe em yet i save pilai ragbi yunien na em i save gut tru long wanem kain ol samting ol mangi long ples i save nidim. Olsem na konstraksen kampani bilong en i sapatim ol mangi long ples.



Branny Libe i givim mani long sapatim lokol ragbi lig long Takipa ples, Lowa Wage LLG, Margarima, Hela Provins.

FINA klinik i bin stat pinis

FINA ran swim klinik bilong kosa i bin stat long Tunde, Oktoba 20, long Taurama Akwatik Senta long Pot Mosbi.

Ol bai ranim dispela klinik ran insait long 5-pela de we em bai pinis long Sarere na i gat tupela de tasol i stap yet bilong pinisim.

I gat 40 pipel bai kisim ol skul toktok bilong kosa husat bai skulim ol.

Presiden bilong Papua Niugini Swimming Ink (PNGSI), Elizabeth Wells, i tok klinik i lukluk long givim ol namba wan swimming skwad sesen we em bai kirapim ol teknik na skil bilong swim we ol namba wan swima i gat long en.

Wells i tok, "John Bladon bai ranim dispela klinik na

Bladon em i Het bilong Akwatik long Knox Grama Skul long Sydney, Australia."

Bladon em i silva laisens kosa na i gat digri long spot saiens long Yunivesiti bilong Nu Saut Wels.

Em i wanpela ekspiriens presenta husat i save presentim ol kos na konferens bilong Australia Swim na Australian Swimming Kosing na Tisa Asosiesen (ASCTA) insait long 15 yia i go pinis.

"PNGSI i welkamim John i kam long Pot Mosbi long givim ol bikipela save na skil bilong em long ol lain husat bai skul long swim hia long Pot Mosbi Akwatik Senta, aninit long tisa bilong swimming strim," Wells i tok.

Garamut i no gat sans long kwalifai

PAPUA Niugini Garamut i no gat sans long kwalifai long 2016 anda 19 Wol Kap long Bangladesh.

Ol PNG Garamut i no win yet long pilai long Intenesenel Kriket Kaunsil (ICC) anda 19 Wol Kap kwalifai long Kuala Lumpur, Malaysia.

Namba wan pilai bilong ol Garamut long las wik Fonde em ol i lus long 9-pela wicket na 245 bal i stap yet na ol Nepal i win.

Namba tu lus em ol i bin pilai wantaim ol Irelen we ol i bin lus wantaim 111 ran.

Wankain tasol, ol i lus tu long namba tri pilai we Garamut i pilai wantaim ol Uganda

na ol i lus long 9-pela wicket gen na 220 bal i stap yet.

Nau ol Garamut i stap las long lata long ol 5-pela kantri i pilai long Kriket Wol Kap.

Nepal i stap namba wan long lata wantaim 6-pela poin bikos em i winim olgeta tripela pilai.

Irelen i stap namba tu long lata wantaim 6-pela bikos em i bin winim olgeta tripela pilai olsem Nepal.

Uganda i stap long namba tri ples wantaim 2-pela poin bikos em i bin win long wanpela pilai long ol 4-pela gem.

Ol Garamut i pilai wantaim ol Yunaitet Stet bilong Amerika asde. Ol USA i stap

namba 4 long lata wantaim 2-pela poin we em i lus long tupela pilai na win long wanpela pila.

Win bilong USA i kamap taim ol i daunim ol Uganda wantaim 6-pela wicket.

Finel bilong Wol Kap Kwalifai em ol bai pilai Tude (Fonde). Wina bai kisim ples long pilai long anda 19 Wol Kap long yia i kam.

Long wankain taim 4-pela namba wan kriket pilaia em Adam Hollioake long Ingran, Brad Hodge long Australia, Mark Greatbatch long Nu Silan na Cathryn Fitzpatrick long Australia, i bin kam long kantri long Tunde.

Ol i bin kam midia skul konfrens na skul kriket program long promotim het kriket pilai na toktok long as tingting long planti dai i kamap long kantri taim ol man i dring na draivim kar.

Jenerel Menesa bilong Kriket PNG, Greg Campbell, i tok dispela raun bilong ol i em i bin kamap namba wan tru.

"Mark, Cathryn, Brad na Adam em ol i kamap save manmeri long las wik na i promotim kriket long PNG na ol promotim PNG tu bikos ol i amamas long kam na ol tok ol i amamas long kam bek gen," Campbell i tok.

LOSUIA to PORT MORESBY
More than just flying; Linking you affordably because we care.

One way
PGK497.50*

Valid from NOW to 01st November, 2015 *Taxes inclusive



Specials
Available
Now!

Reservations - Toll Free: 1800 5465; Email: sales.linkpng@airniugini.com.pg
Find us on Facebook: www.facebook.com/linkpng; Online sales: www.airniugini.com.pg

LinkPNG



Tupela pilai man bilong Hunters i kisim malolo na kamap wara man bilong ol Gurias long taim bilong Melanesia Klap salens.



Ol pilaia na sapota bilong Hohola Flais i amamas long win bilong ol.



Pilaia bilong Difens (namba3) i traim long pusim pilai bilong Hohola Flais long laspela pilai bilong ol long Murray Bareks pilai graun. Flais i winim pilai.



Winga bilong Hohola Flais i traim spit bilong em tasol ol pilaia bilong Difens i stopim em long navel.



Ol BSP junia golf long Lae i trening long kamap top golf pilai manmeri bilong bihain taim. Poto BSP.



Biknem meri bilong Kriket long Australia, Cathryn Fitzpatrick, (orens siot) wantaim ekting Australia Hai Komisina long PNG - Bronte Moules, Lady Winifred Kamit na tupela pilaia bilong ol meri kriket PNG i sanap wantaim long Australia Hai Komisina long kempen long ol man long noken paitim meri.



IMPROVED TASTE! Niupela teist wantaim planti mit na oil. Teistim na bai yu laikim moa yet.

DIANA

Tuna



Emi tuna
bilong PNG



Manufactured by



RD Tuna Canners Ltd.

Moa mit na
oil insait



TUNA IN OIL

Philemon Tame i raitim

PAPUA Niugini Weitlifting Federesen (PNGWF) i kisim K50, 000 moa long Trukai Industris long mekim wok redi long bikpela intenesenel ivent bai kamap.

Ol weitlifita bilong PNG bai go aninit long Intenesenel Weitlifting Federesen na pilai long Wol Weitlifting Sempionsip long mun i kam long Houston, USA.

Na tu ol bai go pilai long 2016 Komonwelt Weitlifting Sempionsip na Osenia Weitlifting Sempionsip long Fiji.

Presiden bilong PNG Weitlifting Federesen, Sir John Dawanicura, i tok tenkyu long Trukai na i tok olsem bihain taim bilong spot i luk orait.

"Mipela i gat bikpela amamas long Trukai bilong ol i stat sponsa long weitlifting long yia 1995 inap nau na mipela i lukluk long strongim dispela rilesensip i go inap long bihain taim.

"Mipela bai salim ol strong-pela senia na junia tim bilong yumi i go long narapela kantri long resis long Wol Weitlifting Sempionsip na Osenia Sempionsip em ol husat bai kamap kwalifai long 2016 Rio Olimpik bihain long mun Ogas.

...lukim moa long pes 25



Trukai mani i go long PNG Weitlifting

DUA I OP YET: Steven Kari i redi long apim ain long Pasifik Gem. 2016 bai gat ol bikpela pilai bilong Wetlifting na dua bilong Papua Niugini Weitlifting Federesen i op yet long Steven Kari sapos em laik go long dispela ol bikpela resis. *Wantok Fail Poto*



ISUZU N-SERIES

the Perfect Business Partner.

**BOROKO
MOTORS**

Port Moresby 325 5255 Lae 472 1144 Madang 422 2659 Mt Hagen 542 1933 Goroka 532 3552 Kimbe 983 5035 Kokopo 982 8193 Tabubil 649 9048
Email: info@borokomotors.com.pg | Web: www.borokomotors.com.pg

